

文 282.597

12

:6



健松齋集卷之二十

遂安方象瑛渭仁著



錦官集上

出都二首

癸亥七月一日

五載承恩久今朝奉簡書敷文天子意論秀

太平初

以寇亂三科未舉鄉試至是始補行

早識蠶叢險寧辭鳥道紆

從來期許志肯負此征車

其二

秋色皇都早迢迢事遠征五年緡史乘

時奉命纂修明史

萬里數郵程巴蜀人才藪淵雲絕代英求賢知不易



後村齋集 卷二十一
篝火記平生

蘆溝橋

虹橋驅馬度萬里是茲行斜日桑乾水秋風拱極城
沙喧羣鴈下岸轉一舟橫遠道從今始遙遙望 帝
京

力疾

力疾西南去晨興控紫駟計程猶積暑按節已新秋
囊藥資行李方書壯遠遊長途千萬里何日到梁州
新樂使院讀王阮亭司成壁間韻因感施愚山
侍講時愚山歿京邸余以 使命不得往哭

屈指神交四十春金門奏賦喜相親誰能折節從知

已真覺忘年是古人三載論文書在篋一時話別語

傷神

余拜命次日詣愚翁言別時病小愈

王程未盡西州慟回首

燕臺淚滿巾

重過真定

畿輔曾經處蒼茫二十年知交非舊日城郭自依然
馬蹴恆山道風高滹水船回思偕計吏淡媿說求賢
渡滹沱河

恆山不可攀滹沱自今古洪波千里來驚沙互吞吐
極目浩無垠遐哉漢光武方其敗常山曾不基尺土

王霸機智深一言安士伍冰堅實天意當時豈逆覩
帝王自有真王郎何足數

其二

嘗歎馮將軍患難遇真主燎衣蕪萋亭麥飯非無補
盛德久不報此言感肺腑風雲際會難誰云共甘苦
倚樹雖不言舊况想如覩君仁臣則恭交歡兩無阻
韓彭菹醢禍豈獨罪高祖

井陘道中

雄關當扼塞曲折亂峰中峭壁雙崖合荒城一水通
地仍蟠冀北山已劃河東漫感興亾事高原野燒紅

出固關宿平定院署和王司成韻題壁

亂嶺危崖氣窈冥人家處處棗林青千盤磴道連臯
落百戰河山控井陘幸逐風流同使節

阮亭壬子秋亦以試事入

蜀漫從車馬問旗亭涼風滿院消殘暑夢破隣雞酒
半醒

自平定州至祁縣連日雨甚興中口占

殘暑初消曉乍寒太行古道雨漫漫應知叱馭心原
切不待西風蜀道難

綿上

貪天雖云謬報施禮則均重耳歷諸國從亾良苦辛

論功顧草草得失昧所因介推耻言祿奉母甘沉淪
招之不肖出何乃然其身志士實傷勇其君或未仁
至今忌坂上禁火愴心神回首望滹沱懿哉漢君臣

郭林宗墓

驅馬綿山路裴回有道祠柳堤荒故里苔草護豐碑
漫憶人倫鑒還憐黨錮時冥鴻天外遠寂寞感人思

文潞公祠

身繫安危五十春耆英會裏老閒身停車徒倚菴祠
畔一代完人社稷臣

其二

恩怨何人竟宵忘休休始信有平章老成勲德成千
古猶記當年唐子方

土穴

恆霍山中民皆穴土為居窻榻几杙悉就土成之其巔依然樹菴也戲為絕句記之

下營窟室上桑麻几榻窻垣事事賒雨後炊烟青縷
縷始知土穴有人家

大雨發靈石

向曉凌寒出韓侯嶺上過崩崖分螳路駛浪捲汾河
敢惜馳驅苦都忘風雨多驚心懷蜀道不識更如何
望霍山不見

恆霍十日雨曉霧紛濛濛中鎮不可覩冥漠疑虛空

後村齋集 卷二十一 四
反若太岳高滅沒巨浸中樓觀以意會仙路無由通
何時披絕巘呼嘯凌天風

豫讓橋

易水弔荆卿趙城感豫讓鼓筑氣何悲漆身實孤壯
擊劔三躍時恩讐諒已暢顧謝范中行亾臣非無狀
先後事似殊烈士殉所向後世禮遇疎廉耻道亦喪
保身異有用王魏遂依傍誰成國士名千載遙相望
悲風咽流泉寂寞秋原上

次平陽

歷盡嶽崎悵遠遊嚴城縹渺雨初收千年王氣通蒲
阪萬井炊烟出晉州落日牛羊遺廟在西風禾黍故
宮秋陶唐虞夏成今古汾水年年遶郭流

文中子故里

千秋絕學重河汾禾黍離離薜荔村三尺殘碑畱姓
字不知何處是龍門

聞喜道中

無端風雨遂經旬三晉河山入望頻驛舍陰森雲外
樹碑題惆悵路旁人荒祠每憶裴中立故里誰哀郭
景純往事不須縈客抱袞斜遙指隔三秦

冒雨渡黃河

後村齋集 卷二十一 五
馬瘖僕病苦蹉跎蜀道青天更若何
萬里崎嶇原不惜那堪風雨渡黃河

其二

廿年僕僕走關河又逐西風此地過
三晉雲山看漸遠秦關車馬雨中多

潼關行

潼關之險天下無下瞰黃河上雄都
一夫當關勢莫敵崇山斷岸愁颺颺
如何范陽噪鞞鼓匆匆棄擲紛長驅
上皇蒙塵貴妃死至今遺恨悲哥舒
天寶往事既如此近時寇患徒區區
李闖困死車箱峽阱獸且

夕供誅鋤誰人出柙縱虎兇貪功誤國
寧足誅秦督陳奇

瑜潼關一出不可遏兩河三晉同
焚屠督師撫軍相

繼歿十年措置空雄圖孫傅庭汪喬年傅宗龍先後戰歿遂使覆亾

及社稷憂勞傷厲胡爲乎天險不可恃
人力還未孤事機一失牀剝膚明社旣
屋闖獻死乃知天意資驅除我來俯仰
潼關道山河依舊人民殊老翁能說前
代事天時人事空枝梧古今興亾信有
數淒風落日悲啼鳥

雨過華山

二華峻嶒碧嶂封遙天空擬削芙蓉
披圖正憶仙人

侯松齋集 卷二十一
掌捲幔真逃玉女蹤
雨宿靈祠秋漠漠
雲埋嶽路影重重
何時更覓驚人句
搔首同登落雁峯

阻水宿蓮花菴

王程萬里敢蹉跎
駛浪奔泉且奈何
今夜蓮花菴裏住
閒身真讓老僧多

渭南和壁間韻

華山烟雨望偏虛
野渡人喧駕使車
水落猶數尺與不得度土人縛

几案擊之以濟清渭蒼茫秦苑舊
終南縹渺漢宮餘
求賢擬

上王褒頌諭蜀寧同司馬書
千疊連雲何日是秦關

秋色正蕭疎

新豐

里社枌榆更築宮
一時雞犬識新豐
分羹却怪軍前語
當日何曾記太公

鴻門

亞父深謀召項莊
鴻門一宴辨興亾
君臣朋友知誰重
偏為畱侯誤楚王

驪山

霸業全銷博浪車
阿房宮殿總丘墟
溫泉繡嶺還如昨
抔土驪山拚鮑魚

後村齋集 卷二十一
鼙鼓漁陽動地來梨園寂寞爲誰開承恩當日多名
部祇有筵前舞馬哀

灞橋

驅車歷徧短長亭流水平橋路杳冥聞道當年畱別
處春風攀盡柳條青

杜曲

曲江三月正輕寒遊賞園亭處處看太息風流韋杜
曲春光非復舊長安

寄家書

漫憶家園遠西征又月餘關河萬里路南北兩行書
未審何時達還愁此後疎寄言休悵望須待錦江魚

咸陽

組繫降王事已悲秦宮又見黍離離須知三月咸陽
火便是桀經一炬時

茂陵

漢家陵墓盡荒丘武帝城還此地畱不見仙人青鳥
下霜風瑟瑟茂陵秋

咸陽懷古

六國滅亡秦運熄阿房粉黛無顏色博浪沙中中副
車一椎已奪祖龍魄鹿走咸陽狐鼠興亡秦豈藉重

倚松齋集 卷二十一 八
瞳力無端炬火驪山宮暴嬴暴楚同推逼長城西望
弔扶蘇今古誰哀秦社稷湯湯汧渭日夕流風雨連
天不堪憶

喜晴

一雨連秦晉今朝喜乍晴稍看初日出還悵曉雲橫
野水奔田白孤村擁樹平終南蒼翠色此際漸分明

霽望

客裏歡新霽朱霞處處勻天高迴去鳥日落見歸人
遠樹青連渭秋山翠入秦回思河朔路風雨遂經旬

望終南雲氣

連岡千百里處處有雲封冥漠時疑雨迴旋或似龍
俄看歸鳥沒漸覺亂山重我欲尋真侶支筇最上峰

楊妃墓

可是當年百寶欄玉魚猶傍舊長安不知褒姒今何
處偏使行人駐馬看

其二

鼙鼓誰令起范陽芳魂終是感君王李唐社稷生禾
黍孤冢還聞葬海棠

其三

誰從蜀道問娉婷雲海沉沉路杳冥鈿合緘封私語

在西風愁絕雨淋鈴

其四

馬嵬羅襪已生塵芳草年年泣太真傾國傾城都不
計還將白土誤佳人

墓上白土如粉婦
女面癡傳之立去

渡渭水

經旬車馬雨中催却喜乘風畫舫開估舶商船連渭
水櫓搖爭道侍臣來

望武功太白諸山

關中多名山奇峭各有故如何行路難都無山水趣
雨沒華山巔終南翳昏霧今晨趨武功太白勢廻互

兩角生孤雲卽之儻可遇新雨添舊流渺然失林樹
去天或三百安從得其處客久資游觀心眸獲所助

山靈不吾愛悵望峰前路

古詩武功太白去天三
百孤雲兩角去天一握

太白山

秦山看不斷太白一峰尊祇見穿天迥都無積雪痕

舊傳山嶽高應伯仲山列總兒孫兩角孤雲起真疑

接帝閭

扶風詠古

銅柱勲名志豈虛伏波祠墓竟何如雲臺不與椒房
戚馬革空憐薏苡車

其二
荒草斜陽隧道開碑題猶自署蘭臺漫言孤冢文章
盡班史終推一代才

岐山縣

騰騰周原上西風禾黍多幽岐千載業惆悵舊山河

其二

遺廟何年在殘碑古道中居人粗解事猶自說三公

尚父周名也

磻溪

夢應飛熊日鷹揚已霸齊千秋祠廟古依舊老磻溪

寶雞示四弟

秋色千山裏荒城正夕陽崇岡迴渭水纖月落陳倉
路入羊腸迴愁侵鳥道長馳驅君健甚猶喜共他鄉

畱別寶雞呂令

清渭今朝渡上流故人相送繫扁舟殷勤話別情何
限此去連雲少舊游

其二

山城信宿喜相攜千里關河信馬蹄寄語京華諸舊
識星輅已度益門西

益門鎮

後松齋集 卷二十一
今古益門鎮遙連棧閣雲穿林孤鳥下激石亂泉聞
古戍秦關盡重岡蜀道分羊腸天下險車馬競紛紛
入棧

凌晨初試險窈折路西東怪石斜分徑層巒遠翳空
馬行高樹杪人語亂峰中望裏褒斜谷青冥一綫通

其二

盤曲今朝始方知鳥道眞峰迴似有路戍遠更無人
山勢遙通蜀泉流細入秦馳驅吾應爾未敢說艱辛

其三

秦蜀分天險當年有舊屯危崖千尺路落日幾家村

瀑急風霆怒林深虎豹蹲停車尋驛舍燈火向黃昏

其四

不盡高低路陂陀上下行蛇盤千百曲鳥度兩三程
日午微通影湍迴忽有聲崎嶇非不憚到此一身輕

大散關

陡絕無如此西風大散關層巖當急溜戰壘剩秋山
一綫通秦蜀千峰控夔蠻太平方罷戍突兀翠微間

東河驛

纔度煎茶嶺分流更向東

坪水東流入秦西流入漢中

連營衰草

沒編竹驛亭空月落猿啼樹林深虎嘯風乍寒偏不

寂切切聽吟蟲

草涼樓驛

故鄉南望思悠悠遠道何時抵益州雙鬢不堪愁裏
白西風一夜草涼樓

夢施愚山

空山涼月白獨夜思旁皇故人忽到夢黯黯微燈光
雍容悅情素舉止頗非常苦索新詩讀嘆賞語偏長
頓覺旅愁豁安知生死忘君家住宣州老死嗟 帝
鄉招魂更何處諒各天一方如何亦草草遠赴道路
旁棧雲高萬疊隴樹鬱青蒼魂來不可見雪涕沾衣

裳

其二

憶昨初拜 命匆卒向君過一言期話別豈復慮其
他促坐壯遠遊執手指岷峨贈別悵無詩衰老病始
瘥於時正健飯神王氣亦和何乃信宿間遽悲鸞鳳
叱老成遂凋謝吾道傷如何令甲扁戶牖 王事敢
蹉跎空負束芻意憔悴走關河念之時愴惻客夜起
悲歌君來不嗔責疚心良已多棧山寒月落惆悵對
巖阿

鳳縣

小縣空山裏茅茨數十家泉聲流漢沔山勢到褒斜
突兀峰頭路紛披屋角花夜涼看月上點點落歸鴉

心紅峽

山勢斷復起人家宿翠微峰峰攢虎豹樹樹走蚍蜉
秋老胡桃熟林空鸚母飛停車聊徙倚曉露正霏霏
自心紅峽至鳳嶺一帶地稍平山水清秀宛如

吾鄉喜賦

一帶峰巒秀悠然似故鄉山光浮翠黛樹色亂青黃
齒齒泉流轉羅羅野卉香誰知棧閣裏清絕更難忘

鳳嶺

又逐秋光犯曉寒峩峩峻嶺倚雲端巖邊怪鳥啼溪
樹峽底陰風鬪急湍不盡千山縈棧道還從一線望
長安由來天險稱秦鳳迢遞關河駐馬看

南星夜宿東王擔人吏部

三五茅茨暑驛亭崎嶇風雨幾曾經半升脫粟三更
夢益部還占二使星

柴關嶺

野店篝篁中山澗更漏悄門喧車馬聲王程起獨
早行行度柴關積雨苦不了雲埋大壑陰霧沒衆山
少怪石紛道周礚礚勢盤繞仰視不見人冥濛有飛

倚松齋集 卷二十一 古
鳥是時秦軍來更戍長安道相值狹路間各自趨林
篠霽行苦並驅風雨寧草草躑躅望炊烟人家蕩如
掃儼舍試燎衣悵然逆懷抱

流壩驛遇同館舊識

幾載同分玉署春客窓話舊總艱辛青芻白飯情偏
好雲棧何當有故人

馬鞍嶺

棧山勢多端馬道最綿衍迤邐千萬盤雨乃益其險
起伏總不經低昂卒難檢閱歷既已多前驅諒不免
叱馭泥濘中巖谷互流轉亂石不知名陰崖護苔蘚
仰睇未到山下視青萬點雷與瀑布爭喧豕無近遠
耳目失所司震撼詎及掩倒瀉積水滾窟宅蛟龍偃
觸石不敢投懼與風俱捲對此怵心魂豈止頭目眩
役夫捷如猿崎嶇倍舒展微聞歌笑聲稍使客心遣

畫眉關

危崖絕壑棧中山
經旬未許閒歷盡千重萬重
嶺今朝又度畫眉關

武關

棧閣重重萬仞山
置身常在白雲間
家園子弟應相
念誰識今朝度武關

馬道驛夜宿

棧泉流不盡漸作江水鳴久客憚滄涼猶疑風雨聲

觀音碓

舊名閻王碓順治中賈中丞漢復煨石開道易今名

未知礪若何聞各實險惡石勢怒猙獰熊虎競爭搏
灌木晝陰陰疾湍相噴薄車枳不得前馬蹄蕩無著
舉步委深淵誰能卽奮躍牛鬼與蛇神往往恣閎爍
森羅變慈悲始覺天日廓萬疊連青屏榛莽盡開拓
圓或如編珠方乃如玉削間存斧鑿痕當年記棧閣
二千九百間遺址尚如昨遂令棧道平馳驅欣有託
夾听曲闌千秋花互開落乃知閱歷疎登臨自駭愕
履險如康莊處處領其略

雞頭關

何時天地坼隕石紛堯堯盤曲七八折天然結構牢
崢嶸勢猛絕絳幘魁其曹始進旣巉削更入方迢遙
拾級循之上不知所歷高危崖千萬丈屈曲梯層霄
湍流當其下勢欲傾波濤轟轟白晝晦不辨人語囂
險絕有如此界限隴蜀交往者逆臣叛據險恣雄豪
道塞飛鳥絕來往無猿猴一鼓奪其氣萬馬同奔逃
遂使蠶叢險依然歸 聖朝於此見天意智力何足
驕在德不在險順逆爭秋毫

侯村文集
卷二十一
聞猿

落日連雲棧秋風猿易哀
淒清臨絕壁吟嘯出陰霾
便下征人淚誰令蜀道來
王程輕萬里爾輩莫相猜

棧暮

棧山晝常晦况復夕陽時
馬倦趨危澗猿哀挂古枝
陰陰林樹黑漉漉夜泉悲
遠道都如此真堪兩鬢絲

抵褒城

棧行亦已盡今始到褒中
野豁峰巒斷天高耳目空
微雲籠夕照淺渚落歸鴻
信宿葭萌近蠶叢路轉通

出棧懷毛會侯

會侯曾爲城固令

十日度雲棧渺然懷故人
當年嗟遠宦今日老閒身
漫道歸田好誰知作客貧
燈前兒女淚南望益沾巾
謁諸葛武侯墓

定軍山下晝啼鳥丞相祠堂跡未孤
漫惜偏安空霸蜀應知遺憾爲吞吳
豐碑寂寞三分業亂石崢嶸八陣圖
檜柏成陰烟漠漠隆中回首綠空蕪

贈諸葛耳鼎

耳鼎世居蘭溪漢丞相武鄉侯裔也崇禎中遷居吾邑今年來京師余適奉使入蜀欣然偕行過沔

後村集 卷二十一
縣定軍山同謁丞相祠墓非偶然也因賦詩贈之
曾過龍岡上知君忠武孫宗祧承越水拜掃隔夔門
誰意源流遠還瞻廟貌存南歸告宗族親到定軍屯

五丁峽

五丁旣闢道萬里開蠶叢絕壁兩岸坼偉矣造化功
如何有遺力不令道路空盤紆費蚓折洞壑青濛濛
飛瀑穿峽出噴薄奔蜺虹散作雪花落倒瀉虬龍宮
石拒水愈怒崩迫久勿東晴天雷雨鬪灌莽搖天風
碎石更磊塊零亂蹊澗中脛觸人氣奪鐵落馬亦窮
乃知天地意戒絕蕃漢通車書旣混一再熨紛來同
何不呼巨靈更施斧鑿工鑿崖摧距角陰谷芟蒙茸
往來兩無阻庶豁千古胸

寧羌

驅車五丁峽日暮趨寧羌荒城積豐草昏霧埋高岡
當年逆藩變三川皆淪亾州將旣不守附逆甘跳梁
烽火烈城邑秦隴羣奔惶天戈已西向燕雀還處堂
秦州開幕府張讎耀戈鋌徘徊戀妻子捲甲歸平涼
井蛙窺何濟進退彌乖張 皇仁等天地納叛度汪
洋孽兒被顯爵賞賚糜恩光未責分寸效覬望真無
將僭亂旣削平賞罰法所當有 詔許入覲四顧方

倉皇中道就冥誅實以昭 王章天意別順逆憲典
森紀綱賊渠何足惜所憾多殺傷試看藁街上僭竊
皆侯王

雨發寧羌州

蜀道晴偏少真疑是漏天荒城無驛舍敗屋有炊烟
氏月沉秋雨羌雲吼瀑泉路危人不慣頭白亂山前

七盤關

雞頭關前七盤嶺蚓曲蛇蟠纔見頂氏中又復度七
盤詰屈紆迴勢相引層崖邃谷路轉通拾級忽見雲
霞空却怪頂觸前人趾不知舉膝當心胸寧心息魄

詫奇絕萬里山川風氣別一關中斷隴蜀分羌笛渝
歌乍相接遙望川巴萬點明白雲紫霧還縱橫鱗鱗
彷彿峨眉雪不知何處錦官城北望京華南望越懷
人兩地情偏切今朝身入大荒西涼風古驛中秋月

中秋次神宣驛

入蜀境

不知今夕是中秋萬里盤紆向閬州路入氏羌天外
遠山迴江漢望中流驚心尚憶連雲棧懷古空聞碧
玉樓雨過郵亭看月好夢回嚴瀨舊扁舟

龍洞背

神龍穿石飛洞壑晝常晦人乃捷於龍盤旋出龍背

躡衣入重雲勢與風雨會危崖千萬狀不知始何代
 突兀浮圖高縱橫屏幃大鱗鬣樹干章泉流吐飛沫
 下注不測溪沉沉氣冥昧倘燃牛渚犀百靈宛然在
 羌山多靈奇策名此為最何必御風行曠然天地外
 放舟嘉陵江

山行四千里車殆馬亦疲南人便舟楫小舫適所宜
 放纜千峰內谿石何離離水石動相忤湍急聲怒嘶
 蕩槳捷如鶩岡嶺紛颺馳羌水扶日出仰見百尺崖
 雄關昌其頂朝天突兀迎朝曦絕壁斧鑿痕參錯畱
 江潛想見舊懸棧虹蜺夾岸垂設想既駭絕况彼驅
 車時西征歷險怪幸復免艱危簡書百靈護小臣

何所知

夜泊廣元縣

息纜葭萌道江寒棧閣空七盤連劔外百丈落巴中
 小縣秋砧急荒原夕照紅欲尋籌筆驛惆悵漢時功

虎跳驛

秋水澹如許扁舟古驛亭平沙雙鳥下落日數峰青
 羌雨侵船細渝歌夾岸聽亂離餘聚落燈火半零星
 蒼溪縣

一水乘流下涼風八月天岡巒澄雨後城郭宿溪邊

亂定才通市人稀學種田杜陵遺句在送客是何年
抵保寧府

名勝隆州最雲山面面齊重關封棧北一水界巴西
閩苑王孫去仙房玉女逃十年征戰後寂寞海棠谿
發閩中至龍山驛

信宿南樓畔晨征未許閒舟移巴字水人度錦屏關
箐莽縈官道炊烟出亂山郵亭何處是碑字蘚紋斑
將赴柳邊驛不及夜宿小猴牙草舍

萬里嗟行役蓬茅一夜栖山深聞虎嘯月黑有猿啼
斲草充疲馬然薪待曙雞長征四千里顛顛是巴西

張桓侯廟

昨過桓侯墓千秋廟食同休休儒將度矯矯虎臣風
不盡三分恨空餘百戰功森然見英爽浩氣滿巴中
文與可故里

茅茨三五傍斜陽道是當年舊墨莊不見清貧饒太
守何人百尺寫箕箒

渡梓潼江

山盡與水遇扁舟各自呼江聲流梓益秋色下荆湖
鼓柁驚魚婢停橈走鴈奴射洪西望近猶憶舊名都

潼川州

聞道潼川勝兵戈十載餘荒榛縈解市廢郭冷丘墟
漫覓郿筒酒空傳丙穴魚不眠聽夜柝斜月四窻虛

潼川懷陳正字

子昂初未遇萬縉碎胡琴長安無智愚聚觀紛如林
鄙夫競歎惜賢者或賞心聲名一朝徧爲慮誠已淡
世人尚耳食山水誰知音王門羞挾瑟狗監安能尋
空懷文百軸撫卷託悲吟碎琴向都市壯氣橫古今
嗟哉貧婁士何計揮黃金

哀川北

七日發閬州五日達潼川中江近千里四顧無人烟

蓬蒿沒道路老樹長原田豺虎白晝嗥猿狖啼樹間
行旅各悄悄怵惕未敢前停車問野老沃土古所傳
往昔全盛時夾道多官廛川北號陸海民物紛喧闐
勝國當末造獻忠恣屠煎殺人供戲樂赫燒徧郊原
兩川百萬衆先後膏戈鋌鋒鏑苦未歇饑疫頻顛連
青燐照梓益白骨橫巴綿遺老哭吞聲至今五十年
聖朝旣平寇下令亟生全招民踰百家爵賞殊翩翩
流移卒未復曠土空連阡比者再遭亂子遺重播遷
婦子各相失患難誰周旋潼川亦都會蕭條無數椽
州守僦茅舍寥落同枯禪城郭久圯廢廨舍狐鼠穿

小民二百戶黽勉輸官錢大道通雲棧力役復屯遭
不知何時止淚落如奔泉太息語野老慘實如君言
我行半天下禍亂此最偏天心幸厭亂 聖化方敷
宣兵革偃不用逋賦皆除蠲汝等延殘喘力穡謀所
天十年計生聚烟火當依然君看昏墊後八表樂薰
絃

廢墟

廢墟慘心目烽火竟誰存漫漶前朝碣蒼涼舊日村
草深餘井臼樹老出墻垣感慨知何故興亾未可論

新都感楊升菴

新都相業名前朝升菴繼起稱文豪父子同時砥名
行聲譽直並岷峨高嘉靖初年大禮起盈庭聚訟何
紛囂孝宗有子奉宗廟興邸嗣統非承祧諸公引經
頗膠固區區宋濮與定陶張桂上書排廷議一言投
契傾羣僚後人諂附失初意稱宗祔廟乃愈淆當時
持論首楊相逆耳批鱗總不搖用修少年盛意氣午
門聚哭連諸曹遂令一第戍金齒蠻烟瘴雨投猺獠
等身著述遺歲月老死寂寞哀南交第宅銷沉竟何
處豐碑表墓還榛茅嘉隆近事且如此琴臺玄冢空
遙遙人生夢幻實堪慟勲名富貴終蕭條身死名存

亦何益差勝泯沒歸蓬蒿

題駟馬橋

犢鼻何年獻子虛
凌雲早已重相如
文人遇合真千古
不羨題橋駟馬車

其二

當年題柱志何如
建節西南諭蜀書
弩矢前驅應自慰
此回差不負高車

重九闈中生日卽事

年年此日菊花黃
玉壘浮雲又一霜
半世每憐虛甲子
今朝且喜度重陽
樓頭鼓角催天曉
座上賓朋語夜長
鎖院沉沉新雨後
剪燈閒泛紫萸觴

望雪山

在威州距會城二百餘里
曉起登樓望之九峰皆白

未是峨眉境何來入座看
蠻中晴亦雪徼外暑偏寒
雲散千峰白霜凝萬壑丹
鱗鱗望不盡指點是松潘
得聞六月家書

音書千萬里遠望正徘徊
驗字緘封好驚心剪燭開
不知冬漸老猶是夏中來
欲報無南雁愁心托酒杯
薛濤井

百花潭畔水分流遺井渟渟露未收
十樣雲箋無覓處滿天紅葉錦城秋

送王擔人事竣省覲還朝

御書萬里正秋新
棧雨蠻烟影共親
我媿歐陽能得士
君真司馬最知人
錦江葉落催征騎
巫峽霜寒趁小春
相送河橋真美汝
竹樓歸省向楓宸

青羊宮

錦城十月野梅香
叩竹初攜到上方
見說函關畱紫氣
至今蜀道禮青羊
臺邊草没仙人字

張三丰詩作六句刻石

裏泉通羽士房
漫向瑤壇問真誥
金文玉册繾蒾

老子謂關尹喜曰十日外尋我蜀中至期果見於大官李氏授玉册金文

忠武侯祠下作

古漢廟今皆呼武侯祠

武侯起南陽三分定
籌策豈不計中原
天心未可逆拒曹
實夙心連吳藉羣
力帝意決南征孫
劉好乃隔重違先
帝心難謝老臣責
六出向祁山區區
勞孽畫盡瘁報主
知寧復避險厄星
隕五丈原錦江寄
魂魄謀士萃簪裾
武臣森劔戟一堂
祖父孫忠貞耀梓
益前祀昭烈以北
地王謀蔣琬費禕
董允龐統關羽張
飛趙雲馬超黃忠
向寵傅僉關興張
苞姜維配後祀
孫尚配大業雖中
殂臣心久已白
君臣廟貌同魚水
應如昔

謁昭烈惠陵

萬里橋西落葉秋
浣花溪上水還流
千年戰伐空存

蜀半畝園陵尚姓劉
祕殿陰森封劔舄
高原蕭颯冷松楸
樓桑王氣銷何處
車蓋童童憶涿州

草堂寺

古寺烽烟後荆榛久未除
半龕明佛火一榻掩僧廬
竹密深藏鳥溪澄細數魚
草堂名字古寂寞浣花居

杜工部祠

卜築何年事爭傳杜少陵
誅茅因侍御裴冕載酒記中

丞武嚴苔臥前人碣香燧別院僧
比來還駐牧衰草路

層層

其二

背郭堂成日羈縲五載中

子美以乾元己亥入蜀庚子營草堂中間往梓州閬

州甲辰復歸成都凡五年檜林娛客况茅屋嘆秋風
老去詩偏細

愁多興不空碑燧看遺像
天地一漁翁

其三

瞻拜荒祠下萍蹤此尚畱
心存唐社稷詩續魯春秋

竹屋斜通徑花溪遠抱樓
江山真占絕千古獨風流

尋司馬長卿琴臺不得

蜀記在市橋西或云卽今金花寺

司馬風流絕代無文君
春日更當鱸鷁裘
貫酒知何處寂寂琴臺徑
草蕪

揚子雲宅

今成都縣治

伊水齋集 卷二十一
縣署凋殘草半青荒臺猶說太玄經桓譚去後侯芭死誰問當年載酒亭

健松齋集卷之二十一

遂安方象瑛渭仁著

錦官集下

發新津

歸程輕萬里編竹一舟寬雨宿彭門曉江連灌口寒人喧來別浦鷺浴起危灘西望華陽道村村木葉丹

眉州謁三蘇先生祠

半城衰草古眉州父子祠仍舊宅畱

祠卽紗縠行舊第

意氣

當年雄洛朔文章千載見韓歐瑞蓮院落莓苔冷木

假山堂薜荔秋

瑞蓮院木假山尚存舊額

爲問老翁泉在否

泉在老泉

墓尚餘一綫理松楸嫡系止存一人州守白於督學馮君雲驤給衣頂奉祠

江行

縛竹任中流軒然一葉舟浮槎天外落蓬屋畫中遊
綠靜一溪水紅餘兩岸秋停橈依野渚草草聽更籌

夜過中巖

諾距羅尊者道場上有喚魚潭客至撫掌魚輒躍出

青衣江上引歸舟熊耳山前暮雨愁咫尺中巖空悵
望有誰沽酒喚魚遊

嘉定夜泊

繫纜嘉州道高城水氣中舟寒過夜雪人語亂江風
問俗無魚舅魚之大者春水時始得尋溪有竹公竹公溪在城北即竹中小

見夜郎王也

丁東泉畔望何處是涪翁

丁東院在高標山下即山谷涪翁亭

雪中遊凌雲寺同門人羅廷掄樊峴來楊聖與
家弟式予

誰肯呼船冒雪遊朔風吹浪逐征裘九峰突兀浮江
出三水迴環抱郭流雅水沫水合流達於江洗墨池邊烟漠漠

凌雲崑畔竹颼颼快談不記歸來晚萬點飛花一棹

舟

爾雅臺

烏尤山下郭璞註爾雅處魚吞墨水頭皆黑今有烏頭魚二三月中見日墨魚

爾雅臺荒已廢墟登臨猶憶舊時書何時更上烏尤
頂三月清江對墨魚

東坡洗墨池

西望睂山一水分時時載酒問凌雲如何閒却佳山水垂老空傳海外文

登高標山望峨睂歌

生平夢想峨睂雪才到峨睂恰冬月雪滿三峨磴道封此生料與峨睂絕偶然拾級高標山九峰三水几前列天寒晝晦烟濛濛巴霧黎雲遮明滅俄見鱗鱗叠嶂開寒光徑與遙天接遊人指點更相呼自是峨睂不須說橫空倒出碧芙蓉萬丈瑠璃浮玉屑錦官城裏望雪山影落蠻荒看未徹今朝真得見峨睂一

氣杳冥無斷缺不辨岡巒萬樹青滄茫那識金銀闕聞道冰寒夏沁人山僧至老忘裘葛斲薪積粟歷冬春僵臥何曾到門闕乃知勝地自幽奇天地無心氣蟠結願得移家傍此中蕭疎枕簟消暄熱便是綏山地上仙不用騎羊問真訣

峨睂一名綏山葛真人騎木羊遊此

馬州守貽香海棠雪蘭各二盆口占寄謝

海棠香國美嘉州誰信芳蘭帶雪幽喜值風流賢太守一時清韻滿歸舟

犍爲縣

聞道犍爲郡猶餘小縣名空山凋桂樹

舊傳金粟山多桂

遺

廟指花卿唐牙將花敬定討平段子璋廟食於此水落岷江夕舟移漢
水平停橈更剪燭欹枕聽灘聲

發敘州

鬱姑臺畔曉又喜放船歸怪石黃沙渡盤渦白鷺磯
峰橫江路盡湍轉雪山飛回睇戎州道層層入翠微

夜泊南溪縣

江行千百里夜色滿輕槎浪捲灘聲白天低日影斜
寒星飛別浦歸鴈落晴沙戍鼓荒城近挑燈語歲華

江安尹吉甫廟

南望穆清廟北上撫琴臺遐哉尹吉甫文武中興才

如何家庭有遺憾沉江孝子悲黃埃履霜操淒且哀
子安操何時回衣苔帶藻瀘江水蕭蕭落日悲風來

戲題江陽兒祠

銅馬入焚知何時不應輒有江陽兒江陽誰占貴兒
氣邑人殺此將何之求兒兒死帝旣怒何乃徒禁冠
帶爲情衰法縱兩無取爲兒且築江陽祠江陽祠彼
何知蠻中誕漫類若斯不知祠今還在否令人却笑

江陽兒

魏武帝廟

蜀魏不兩立城西漢相壇不應瀘水上顛倒祀曹瞞

合江夜泊夢攜樽遊西湖道遇里中故人索余
書冊子爲七言詩一章見贈醒後記首句及
佳人三句枕上足成之

爲君作歌君勿忘西湖花暖春日長畫船簫管孤山
陽揮毫潑墨搖光苾蘇公隄上柳絲颺佳人楚楚奉
杯觴雙鬢侍兒垂明璫未行先爲整衣裳不須舞隊
紛成行人生適意詎有常知足不殆宜自量何爲躑
躅道路忙燕趙秦晉車馬僵陸奔棧閣舟瞿唐牽船
且復浮江黃身如轆轤顛毛霜吾將歸老桐君鄉浮
家載酒三峰旁兩湖明月延清光有時一棹凌滄浪

西溪十里梅花莊

江霧

江霧濛濛合晴天未肯明蒼茫沉日影隱約露灘聲
衣重真疑雨舟移不辨程巴渝無瘴癘稍遣客愁輕

江雨

蜀道常多雨方宜十日晴宵來占水氣半夜落潮聲
岸草奔船濕村烟裊樹橫鳧鷗偏適意濯濯浪花平

抵重慶府

城踞石山頂
三面皆水

石擁高城俯巨流西南形勝古渝州灘聲驟落夔門
曉山勢遙分夔道秋風雨千帆巴子國烟霞萬樹荔

枝樓亂離此地還如昨呼酒臨江壯遠遊

舟發重慶

萬里歸程便巴城數日留諸公偏愛客今日喜登舟
自新津以下皆乘筏子至是始更舟城市層層石溪山面面樓俄聽棹
謳發談笑唱渝州

泊木洞驛

纔過巴字水驛舍幾人存壞壁封雲氣晴沙驗水痕
舟移江樹合潭靜浪花翻兀坐銷清晝山山落照昏

荔枝曲

涪州荔枝園唐時上供七日至長安

誰築荔枝園千株媚妃子紅塵驛騎飛粲然一色喜

不念民力勞棧山幾千里西巡歷險艱淋鈴雨未止
六軍驕不行貴妃馬嵬死不見荔枝來蜀道難如此

鈎溪堂

涪州北巖伊川註易處黃山谷題曰鈎溪

先生讀易處探賸還鈎溪不見賣醬翁篋叟何處尋
易學聞在蜀流傳罕到今惟有涪江水潭靜空人心

江心石魚

聞道江心老石魚三十六鱗今何如涪江水落魚應
見爲我一寄江東書

平都山

酆都王方平得道處有麻姑洞

采藥何時去王君今在無江雲來絕壁岡月下平都

倚松齋集 卷二十一 六
城接蒼崖近亭畱翠柏孤滄桑經幾變我欲問麻姑

忠州

平都山下曙光分倚棹雲根日未曛

忠州雲根驛

一死正

哀巴蔓子千秋猶憶嚴將軍荒祠月落魚龍夕古屋

風高鳥雀羣酌酒臨江思往事忠州名姓至今聞

州以

二人各

謁陸宣公祠墓

西湖祠廟新秀州橋亦古巖巖陸敬輿千秋耀樽俎
丘墓還此間一杯掩蜀土浩氣滿天地都忘遷謫苦
方其佐中興艱危非無補封事千萬言忠誠出肺腑

詔書下奉天海內知君父至今懷往事遺書恍如覩

我來拜墓門漠漠涪江許殘碑不可讀辨香肅祠宇

誰是裴延齡奸諛骨已腐

公論裴延齡謫忠州別駕

石寶驛一帶石奇甚得十二韻

石立江流斷雙崖通一門縱橫各有意突兀本無根
幻若雲霞變幽疑洞壑存屏開施枉渚笏立壯江村
曼衍魚龍集猙獰虎豹蹲競奇非一狀互長更誰尊
懸溜巖中出驚濤天上奔雨隨飛瀑落雪捲浪花翻
天地造靈秀鬼神恣吐吞棧山原異派夔峽預驚魂
彷彿畫圖見都無斧鑿痕米顛如乍遇狂拜不須論

夜泊萬縣

小縣倚山椒江邊夜寂寥河燈循浪轉市柝出城遙
夜靜蛟龍偃山空豺虎驕故鄉何處是南望指星杓

白萬縣至雲陽作

水與石爭險驚心強自寬但看舟出沒不記路巘岈
浪束青崖寺風橫白鶴灘長年方整暇指點度危湍

雲陽縣

寂寞雲陽縣平沙過雨痕夾河餘戰壘落日見空村
市上過饑虎城頭嘯野猿不堪聽舊事烽火徧夔門

譚弘再叛據萬縣之天成山王師從夔州西討築城于此

登夔州城樓望八陣圖

夔府城高一徑斜武侯祠廟鎮川巴空畱大業成千
古尚有遺蹤粲五花水落魚龍浮舊磧江空蛇鳥出

平沙牟彌鎮上遙相望颯颯陰風起暮笳圖凡三一在夔州一

在新都牟彌鎮一在棋盤市

登白帝城

喜近瞿唐口還登白帝城公孫餘故壘城公孫述所築帝子
駐行旌峰削重關險臺連峽水平倚闌看灩澦歷歷

大江聲

白帝城謁先主廟

白帝城邊蔓草黃永安宮外樹蒼蒼三分未盡中原憾百戰還依蜀道長古殿霜風回灩澦空江夜月冷瞿唐孫吳曹魏知何處魚水君臣尚一方

灩澦水

當年灩西水今日草堂河名爲詩人改山從舊日過登臨愁不盡感慨意如何悵望東屯月蕭蕭挂薜蘿

杜少陵宅

浣花溪邊草堂好背郭初成春色早晚年更卜灩西居領略山川都不少灩西一帶溪流清渚田漠漠皆秔稻白鹽赤甲互崢嶸東屯月落瞿唐曉策杖閒登

白帝城詠懷古跡恣探討長鑱白柄悵遠遊故園杜

曲空縹渺未能歸臥南山邊萍踪應向此中老無端

去峽下荆門老死耒陽胡草草乙巳離成都居雲安丙午自雲安寓夔州

西閣丁未遷赤甲又遷灩西秋遷東屯復自東屯歸灩西戊申出峽至岳州已酉留潭州庚戌卒于耒陽

宅舍東屯屢易主故券傷心跡如掃陸務觀記東屯李氏居已數世

距少陵纔三易主唐時券尚存我來西閣問綺疏哀壑無聲魂悄悄

不見傷秋感與人日暮江村數歸鳥

灩澦堆

誰將一拳石倒塞瞿唐口危崖兩岸分江聲出左右如象或如馬水落勢逾陡誰云神鬼工或有蛟龍守

締造始何年位置諒非偶虛無根自然不在天地後

瞿唐峽

蜀都天險雄氏羌西通棧閣東瞿唐棧山連亘近千
里瞿唐萬丈凌穹蒼倘使山靈鬪奇怪嶙峋各出無
低昂昨日放舟出夔峽危崖陰黑埋天光一門中斷
江水落倒撐灑瀨橫中央赤甲白鹽相向立高城陡
絕連崇岡王公設險守其國此中不用資隄防一夫
拒守梯徑絕蠶叢終古無興亾如何五丁旣開鑿更
姓易代紛靡常子陽井蛙固爾爾何論蕭李與孟王
前朝傅廖下西蜀

明初傅友德廖永忠平蜀太祖第其功日傅一廖二

近時叛

帥膏戈鋌

賊將王屏藩吳之茂

世修降表成故事面縛歸璧道

路旁乃知恃險非全策山川豈爲人爭強興廢得失
何時已鴉啼猿嘯空悲傷

魚復城

赤甲山上

何年魚復國赤甲倚天根恍惚蠶叢舊誰招杜宇魂
山川畱蜀徼風雨隔夔門興廢都如此滄桑總莫論
出峽

萍蹤剛半載漸喜是南來水落瞿唐峽波恬灑瀨堆
巴渝行處盡荆楚望中開日暮歲行盡何時鄂渚杯

巫山縣

山形如巫字故名

奇絕山成字應知縣姓巫高城千嶂合絕壁一峰孤
峽底波瀾靜天邊鳥雀呼陽臺空悵望神女在還無

高唐觀

見說襄王入夢來片雲還自傍陽臺行人爭問高唐
觀誰識當年作賦才

神女廟二首

舊在峽中今移琵琶峰下

琵琶峰畔峽江分神女祠邊落日曛寂寞章華衰草
沒更從何處問行雲

其二

暮雨朝雲夢已闌巫山巫峽望中看荒祠非復陽臺

舊環珮蕭蕭夜月寒

戲爲神女解嘲

未必高唐夢果真玉釵羅袖本騷人河東牛女都無
據不見陳思賦洛神

峽中野泊

勞人真草草萬里信歸舟誰意夔門別還從巫峽畱
寒風搖夜纜細雨襲征裘去住都難必何當賦遠遊

巫峽

亭午見微日方知巫峽高峰橫江路斷岸轉朔風號
野鶻啼虛壁吟猿度石槽舟行乘水涸未敢狎波濤

歲暮

南北東西路迴旋直到今看山忘臘盡問俗駭冬深
峽急啼猿切天寒落日陰無端風雨夕望遠益傷心
三分水巖半三泉眼分流甚奇舟人言相傳上
為川水性浮中湖廣水性平下江西水
性沉好事者淪茗試之果然余以風逆
舟不敢近未及辨亦未解何所取義也
峭壁千尋總不羣半山歷歷細泉分何人辨出三分
水陸羽茶經或未聞

望十二峰

層崖處處削芙蓉爭指巫山十二重神女祠荒環珮
冷天邊妒殺美人峰諸峰皆峭壁美人峰最高秀

萬流驛楚蜀分界處

驅車燕晉指三秦羌蜀巴渝入望頻自下夔門度巫
峽荆南萬里舊遊人家仲兄理荆州余畱署
中兩月今十八年矣

巴東縣

艤棹古巴丘孤城俯急流人家依斷岸官舍出高樓
近蜀猶天末浮荆正上游歸程應不遠還恐北風愁
寇萊公祠

過歸州

萊公遺澤在雙柏隱荒祠不及公安竹年年感舊思
峽急舟行疾遙遙望秭歸崇崖驅水立駛浪夾城飛

雪散青魚港風歛白鷺磯停橈向江滸亂後客船稀
兵書峽

層巖千萬疊寸寸束兵書黃石圮橋授陰符渭水餘
何人封寶笈終古闕孤虛我欲探靈奧龍威山隱居
阻風屈沱謁三閭大夫廟

三湘東望遠故宅叩靈均苦憶行吟日誰爲獨醒人
猿聲歸峽晚梅信楚江春時將立春欲寄招魂曲無由問
水濱

楚王故城

古丹陽城在屈沱

朔風颯颯捲層波棹宿寒江亂石多楚殿丹陽無舊

築姊歸祠下屈原沱

阮亭云陸放翁詩商略此時須痛飲細腰宮畔過重陽卽此地

夔子城

俗呼舊歸州

夔巫百里古諸侯遺址還從昔日畱日暮空江三峽
路猿聲啼斷舊歸州

宋玉宅

騷賦源流屈左徒招魂九辨問荆巫悲秋感慨思何
限神女高唐事有無

昭君村

聞道明妃有舊村那堪生小入宮門畫圖未識君王
面不待琵琶掩淚痕

新灘

天寒水落峽江平何處崩雷萬壑鳴
自去錢塘剛十載今宵聽徹早潮聲

其二

峽險無如此地難飛濤十丈涌危湍
輕舟出沒波光裏不數延州黯淡灘

空舸峽

纔過三灘險空舸水勢分峽寬初見日
江暮欲蒸雲健鶻舟前落哀猿石上聞
朝來朔風靜細浪碧成文

黃陵廟

湍迴明月峽曲折到黃牛古屋祠神禹
殘碑憶武侯空山餘古雪亂石抱高樓
落日西陵路聞猿引客愁

峽中夜汎

夜靜風初霽黃陵好放舟峽雲當岸落
峰月下灘流遠火明村舍恬波起棹謳
更闌誰秉燭空擬問三游

三游洞黃金藏皆瀕江以夜過失之

夜抵彝陵州

舟車半載道途間喜泛輕橈萬里還
日暮寒雲流斷峽夜深斜月冷空山
灘聲乍轉黃牛驛帆影遙分白虎關
望裏峰平江水濶彝陵今夕喜開顏

過宜都縣

彝陵東下一舟閒十里江城烟靄間雲樹蒼茫看不
厭輕橈已度虎牙山

松滋舟中立春

燕市秋前別今朝又早春半年多病客萬里未歸人
臘雪愁中盡寒梅望裏新南行舟楫便莫悵楚江濱

百里洲

漸去松滋遠茫茫百里洲晨光搖浦樹午爨出漁舟
鴈宿千羣白鴉飛兩岸秋烽塵餘戰壘一帶對江流

重過荊州有懷家兄雪岷

攬轡章華事已虛重來景物近何如城邊車馬移新
邸陌上雞豚憶舊居勝地全消烽火後交游都值播
遷餘空懷往日冰堂宴數載分攜少報書

冰堂在荊州理署

午過公安

烟樹孱陵驛江天過雨痕柔風迴水面細浪沒沙根
漠漠看飛鳥蕭蕭見遠村殘冬偏道路昨夜下荆門

荆門山在宜都與虎牙山對

攬鏡

不欲頻窺鏡蒼顏病裏更開囊重拂拭對影喜分明
藥力扶衰困風霜老半生年來添鬢雪又見兩三莖

泊壺瓶套

日落劉郎浦

浦在石首縣東俗傳昭烈迎孫夫人於此

停舟野渚東冥冥

烟霧合寂寂戍亭空水鳥黃沙岸江豚白浪風漁人方獨釣暝立夜船中

舟中風雪有感

三冬蜀道不知寒出峽風霜鬪急湍南望岳陽東望鄂茫茫烟水雪中看

其二

朔風吹浪雪飛花斷岸江流噪晚鴉半載都無羈旅意今宵誰道不思家

其三

空江日暮雨霏霏野渚無人冷釣磯剩有新醪銷客夜香橙碧藕鱖魚肥

洞庭湖

出峽下荆門江流寢以大乍落城陵磯遂與洞庭會朔風紛怒號洪波競澎湃烟水浩無邊濛濛氣冥昧周亘八百里誰從得其槩橫睇岳陽樓崢嶸出湖背君山數點青渺然天地外蒼梧弔虞舜湘靈儻還在廿載習波瀾斯川信為最多病倦遠遊放眼湖光內平沙障巨流適與巴丘對領略見大意垂老幸無悔

倘從衡湘遊登臨或有待

望岳陽樓

宋滕子京建范希文記蘇子美書邵竦篆稱四絕

雪風初霽見平蕪望裏巴陵入畫圖閣影正浮麋子
國江聲直上洞庭湖神珠夜吐半明滅鐵笛晨吹乍
有無便欲凌空探四絕湘君祠下弔蒼梧

城陵磯

洞庭漭無際城陵當其門吐納三江口仰接瞿唐源
連拳浮水面浩渺灌山根西南扼要地水氣連朝昏
王師初討逆萬里風雷奔決戰巴陵下礮落湖水渾
長驅蕩安史益知主極尊遂掃鯨鯢窟依然禾黍

村曖曖高原上日暮散雞豚

白羅山

旌旗隊隊護南回畫舸乘風向晚開不用驚心籌夜
泊官貧萬里蜀中來

舟中大雨

寒江來急雨浙瀝響疎蓬滴破三更夢驚迴五夜風
擁衾還問客擊火漫呼童畱滯偏如此何時鄂渚東

大風

甚雨苦未止寒風夜怒飛萍搖青雀舫沙捲白羅磯
遠道何時至鄉心到處違纜船成獨坐惆悵說南歸

大雪

風雨催殘臘何當驟雪寒一時逃浦溆萬點沒江灘
久客真無計隣船各自寬不須添旅感自古路行難

阻雪放歌

滑州城邊元旦雪驅馬勞勞苦未歇回首風塵二十
年長江今又殘冬月白羅山對岳陽東疾風急雨虬
龍穴飛花萬點怒濤翻雪光遂與波光接人家向水
閉其門漠漠寒空飛鳥絕故人相待漢江濱謂羅子
魯峰
咫尺茫茫更誰說對此真令百感生寂寥况是椒花
節行繞十輩江漢人一夜思鄉情慘切就中燕客最

傷心汨落征裘氣嗚咽主人太息強相寬自古悲歌
行路難王事馳驅我應爾汝曹萬里衣裳單甕中
有粟尊有酒西望荆門東樊口推蓬放眼洞庭山踏
雪氣蒸雲夢藪赤壁山橫古戰場孫劉往事今存否
望古長懷天地間聚散何常烏兔走丈夫有志在四
方戚戚窮愁奚足取

雪中有懷二十首

其一

益都真定馬邑諸先生
以病皆未得奉書省候

師弟追隨廿載餘萍踪飄泊歲新除漫言奉使西南
好病起慙無半紙書

其二

癸卯丁未諸同年每
月一會京邸稱極盛

天涯兄弟共新年
妙舞清歌向綺筵
雪裏飛觴應更勝
可知蜀客冷江邊

其三

館中
同年

五年簪筆共清班
遠望真如霄漢間
蜀道青天千萬里
至今風雪擁江關

其四

米紫來典試雲南
汪悔齋冊封琉球

滇南萬里可曾歸
海外仙槎信息稀
同是王程歸未得
飛花偏逐使星衣

其五

汪鈍翁諸君
先後假歸

田間歲月幾人閒
真笑風塵老客顏
夜靜江寒空悵望
詩成斗酒共家山

其六

姜西溟黃俞邨萬
貞一三君在史館

話別燕臺有故人
誰憐羈滯楚江濱
遙知珥筆金門夜
燒燭題詩賦早春

其七

王仲昭
洪昉思

舍人踪跡老京華
顧曲狂生客是家
莫向白羅山下望
錢塘回首各天涯

其八

西泠毛稚黃
王丹麓諸子

吳山南望朔風斜
北墅琴尊感歲華
記得十年風雪

夜呼船載酒問梅花

其九 擬訪倪閣公

送君南去我西行萬里懷人百感生寄語雲林休浪出浮江先問石頭城

其十 王擔人先余回楚

半年喜共錦城秋歸去先登舊竹樓萬里還鄉親未老椒花一曲醉黃州

其十一 同邑允大若韓二檢討皆假歸

金門三載喜同朝每怪投閒學寂寥今日寒江真羨汝鹿門妻子共良宵

其十二 羅魯峰約余十二月至漢口

南旋相訂是三冬握手同登大別峰見說漢陽三百里一天寒雪路千重

其十三 毛子會侯

垂竿戴笠子陵磯聞道西泠尚未歸生計不堪常作客可曾重理舊雙扉

其十四 里中同學

雪風瑟瑟捲征裘辛苦歸人江上舟羨殺故園兄弟好青魚紫笋不知愁

其十五 家助教叔候官京邸

莫便臨風憶故鄉
園橋冠蓋引椒觴
杯闌倘憶長江
客只道南回已漢陽

其十六

長兄家居仲
兄客廣陵

夢回時傍舊書幃
江雪江風濺客衣
別思不堪頻望
遠長天陣陣鴈行歸

其十七

內弟吳孝
廉兄弟

幾年兩度共長安
萬里川湖入夢難
聞道慈幃方健
飭團圓春酒醉辛盤

其十八

門人馬子教思沈子朝初
高子壽名送余出都門

秋來扶病事西征
萬里猶憐阻客程
却憶慈仁松下

別殷勤真見故人情

其十九

川中諸
門人

杞梓榎楠總蜀才
錦城惆悵一帆開
那堪風雪空江
晚辛苦求賢萬里來

其二十

諸兒在家
久未得信

風雨無端動遠愁
兒曹應念蜀中遊
秋前早寄南來
信有夢誰還到客舟

癸亥除夕

新隄在臨湘
縣東六十里

雪花如掌楚江隈
又逐晴光向午開
鐘鼓聲中喧晚
市旌旗影裏過疎梅
蹉跎空憶千山遠
潦倒真憐萬

里來夜久蓬窓人靜後椒花試引客中杯

甲子元旦

牌洲在嘉魚縣東七十里

江村遙夜一閒身遠道都忘歲月新早起正當更甲子不眠絕勝守庚申星星爐火團歸客草草辛盤接故人却喜乘流風色便片帆南下慰初春

赤壁

嘉魚大江濱

臨臯兩賦後赤壁昌黃州今日浮江表當年截上游謀成元瑜亮戰績自孫劉往事空憑弔江聲日夕流

過鸚鵡洲

廿年鸚鵡洲前望今日帆乘鄂渚風衰草未知新歲改平沙猶傍大江空名成不用嗟黃祖表薦能無負孔融惆悵當時豪鼓史武昌回首夕陽中

抵漢口

大別山前路重來二十年春風仍漢口落日下晴川燈火千帆影樓臺萬井烟塵勞猶未息還上鄂州船飲羅子鏡堂

停橈訪舊度江關好友相期漢水間梅萼幾枝春尚早辛盤五日客初還圖書香繞君章宅烟樹晴分大別山回首巴渝千萬里今朝對酒一開顏

漢上遇俞掌天讀冬邸見懷作和韻奉酬兼送

之入滇

別來扶病向蠶叢萬里歸舟又漢東握手尚憐同旅
况論心不用寄郵筒晴川載酒春偏早鄂渚懷人句
轉工客裏只今還送客輕帆好趁洞庭風

和武昌諸子立春日登黃鶴樓限韻是日余在

松滋道中

瞿唐南下望三峨峨眉山有大峨二峨三峨客裏逢春傍淺莎霜

鬢自添新歲月萍踪猶記舊關河乙巳秋冬余兩登黃鶴人依

別浦殘冬盡酒入他鄉旅思多聞道諸君同勝集登

樓憑眺正高歌

其二

遊踪聚散總飄萍最愛登臨對遠汀黃鵠磯頭衰草

白金華山外亂峰青一名大觀山不堪臘鼓催年盡尚有

漁歌隔浦聽此際高樓多逸興客船猶逐短長亭

同孫豹人諸君遊洪山寺

芳郊登眺喜同羣古寺晴開鄂尺樓臺春水

澗半軒松竹午鐘聞人逢旅舍愁都盡路入斜陽酒

易醺楚國陵園何處是還披苔蘚讀遺文亭有故楚王石刻詩

清明發武昌

客裏逢寒食江城放纜初雨添春水急風入畫簾虛

留滯緣多病交游慰索居經旬無一事惆悵武昌魚
重過黃州

又從赤壁艤扁舟春雨連旬漲綠流定惠海棠今在
否空聞兩賦重黃州

其二

臨臯亭畔倚斜曛不盡江流日夜聞太守竹樓無覓
處誰人更識鮑參軍

泊蘭溪驛

黃州初放纜愁絕石尤風近浦帆爭落橫橋路轉通
漁燈依岸小佛屋俯江空香草溪名在京泉憶陸翁

蘄水道中

暫息蘭溪棹山城一徑偏波新寒食雨風靜養花天
細柳縈官道輕鷗逐小船鳳樓山下望何處第三泉
宿浴蓮菴

銜命新從萬里歸層城春色正芳菲高樓過雨青山
迤野水平橋白鳥飛晝靜不知門近市夜涼時有
露侵衣偶然訪舊來僧院一榻鐘聲入翠微

張郭山先生

時便道謁房師

其二

禪房曲曲傍城幽楊柳隄邊芳草洲三月春光花滿

徑一簾秋影竹當樓

秋影閣龔公題額

鐘清別院僧初定門

掩寒燈客暫留聞道淮南遺澤在文章詩酒自風流

菴為故宗伯龔端毅公宰斬時為詩僧恆度建

田家鎮阻風十六韻

三月蘄州棹春江喜正晴計程來蜀徼望遠隔燕京
 萬里歸難到千山晚較明俄聽風夜吼還怪雨爭鳴
 駛浪驅蓬轉驚濤夾岸生長年方氣奪僮僕總魂驚
 繫纜循漁港停橈傍柳營雪翻千片影灘雜五更聲
 啁鵲迎飈疾翔鷗掠水輕市燈時蕩漾野燒乍縱橫
 或擬須臾憩誰期信宿縈重煩更漏卒遠駐護行兵
 坐久杯無力愁多夢不成起看江霧黑望盡浪花平
 寂寞甘寧廟迢遙庾亮城長途都若此惆悵客中情

登江州琵琶亭

潯陽江畔落歸帆白傅風流喜未芟一曲琵琶千古
 淚不知何處弔青衫

彭澤縣

羣山圍縣郭門對大江邊峭壁通樵徑垂楊宿釣船
 一官堪吏隱五斗尚歸田始信浮名誤從今學醉眠

小孤山

拳石根天地洪波相往還雙崖橫灑瀕一點落金山

壁立魚龍內峰搖鷗鷺間靈妃祠廟古肅穆踞江關

馬當山

陸魯望銘天下之險在山曰太行在水曰呂梁合二險而為一吾又聞乎馬當

二險聞兼擅登臨諒不同祇看江觸石似有路盤空
舟檝烟光裏祠壇水氣中子安浮薄士猶助一帆風

抵安慶憩天寧寺

萬里嗟于役停橈向皖城江樓花漸老僧院月初明
簾靜疎燈影窓虛遠磬聲征塵何日息北望指神

京

四游詩舊序

余之定交方子渭仁也自壬辰春仲始猶憶同學十
有二人以制舉菘集於語石時余齒最少渭仁長余
一歲尤負氣自豪每當同人搦管拈題苦吟面壁余
與渭仁輒握手修篁怪石間相與縱談天下事或誦
近所為詩歌共質問以諧謔日向午猶不肯成一字
同人來相敦迫渭仁始振筆直書濤怒雲舒不可端
倪余雖目懾之未嘗不退而心折也後十餘年癸卯
余濫竽鄴李而渭仁以計偕過鄴出塗次所為詩與
其大阮稚稷挑燈盃讀為之掩卷嘆絕是即篇首鄴

遊草也及渭仁射策金門不遇汎舟南歸道經汝泗
江淮之境吟咏間作遊不止於燕而燕者公車之所
從事也故自次其詩爲燕遊草其後復與余訂山陰
道上游余以它事後期而渭仁遍歷諸勝以歸眉宇
間若有矜色探其篋果得越游一冊余嘗以詩謔之
所云驕我囊中禹穴詩者是也渭仁又嘗謁其仲兄
雪岷於荆署凡彭蠡之雄匡廬之秀與夫赤壁黃鶴
之幽奇鉅麗一皆以詩發之而以郢游草終焉集成
顏曰四游乃問序於余余謂山水之勝必藉人而重
然計余足跡所歷于鄴于燕于越較渭仁所未至者
獨三湘七澤間耳而篇什寥寥多散佚不存卽存者
亦如里曲農謠不堪問世豈非余之不足爲山水重
山水之必藉渭仁而重可知也山川藉渭仁而重余
言又何足爲渭仁重哉顧渭仁齒力方壯行且祖武
克繩馳驅皇路輶車所閱憑慨易生其以詩名集者
卽十遊尚未有艾而余之心折渭仁者終不異語石
握手時矣如以余言爲諛曷過同學諸子而問焉同
里毛際可

好奇者慕山澤之勝往往裹糧爲千里游及遇高巖
大壑必披蒙茸冒波濤而後得至至則長嘯高吟不

肯卽返然而囊橐不給則耳目亦有所不能徧宦游之士留情登眺宜無不可以從其所欲然阻於簿書期會者有之傷於去國懷鄉者有之是人與地常不相值也若夫旣好遊矣而不必裹糧有良芻可以唱和身列縉紳未膺民社之寄豈非游之大幸哉此方子渭仁四遊草所以作也渭仁少年登第勤心著述以爲足跡徧天下無以發其胸中嶽嶽浩淼之致故常涉漳水訪銅雀遺踪登畫錦堂問魏公之故里斯時也毛會侯司李鄴中濟勝之具可無慮矣雪岷先生理荊州渭仁以省兄之便鼓彭蠡之棹命匡廬之屐而赤壁黃鶴之瑰麗盡在奚囊至於燕 帝王之都也黃河據其南太行繞其北奇人傑士於此萃焉渭仁射策金門再至其地長安得意可稱壯游夫數歲之中足跡幾半天下不幾倦游乎渭仁曰未也吾聞東南之美有會稽之竹箭焉雲門禹穴之奇蘭亭鑑湖之邃近在百里可不一至其地于是無幽不涉無勝不窮登臨憑弔一一托之吟咏大者關民風土俗之宜小者極草木烟雲之變披讀一過可當臥游使非當優游需次之日以性情之所欲而合于耳目之所及烏能寫之若是余山澤人也惟於越爲故

游地曾有游草而于鄴于郢于燕概未之至不特詩讓渭仁卽游亦讓渭仁也余愧矣餘杭陸進

詩以四游紀名也何紀爾重其地故紀之紀之者何方子渭仁也方子渭仁曷爲紀游也禮曰丈夫有事于四方方子嘗登會稽至郢中抵薊丘過鄴城名山大川無不之也方子曷爲其無不之曰方子相國之孫也相國以下職官相繼方子壯舉於朝又擅令名貴而有高志故無不之也游何必以四會稽南有四明東望天台當越分野禹穴在焉郢中古荆楚國有衡陽巫峽之奇其俗猶有歌曲遺風薊丘古帝都西控太原上黨北跨遼東雁門其中具五民多天下喜游子弟鄴城爲天下中面據漳水東隣海岱之險南綰豫章長沙方子自富春踰錢唐左轉而西繇姑蘇渡揚子盡游歷矣王制曰太師陳詩以觀民風左傳季札聘魯請觀列國之樂方子早樹風聲爲時取則推敦厚之教不可一日無詩本采風之義不可一地無詩思令名之重不可一游無詩詩曰樂只君子邦家之光樂只君子德音是茂非方子孰能當此者乎仁和徐汾

無稽思令各之重不初一欲無稽稽日樂只茲于洪
 卦獲學之終不河一日無稽本承風之養不河一此
 季休鄂魯諸購區國之樂文于早樹風聲為報頌
 藝壽于盡我聖矣王師曰太爾刺荷以壽月風之對
 餘新章是也文于自富春佩送君之舞而西歸故蘇
 幾于車牒楚為天下中回對章水東綴幾於之劍南
 登大風土黨北嶺登東瀛門其中具正月參天不喜
 健松齋集卷之二十二

遂安方象瑛渭仁著

四遊詩

鄴遊 燕遊 越遊 楚遊

登桐君山

鄴以下

桐君采藥去姓字便為山石古松拳曲鐘清雲往還
 江聲叢竹外碑字蘚苔間即目蒼涼甚僧貧喜院閒
 渡錢塘

十年湖上久今始汎錢塘風迅忘江濶潮平見草長
 人聲喧晚渡山色蕩晴光遙對西陵路烟橫隔杳茫
 西興道中

江盡平沙軟人家簇一關輕橈行越水晴日辨吳山
桑柘繁陰合松筠小院閒會稽東望近城郭翠微間

蘇臺懷古

姑蘇城外草萋萋姑蘇城上晚烟迷一水環流浸海
國萬家燈火連高堤樓臺崢嶸如畫裏漁舟買舫江
之涯殷周三讓高風遠延州季子留荒碑王僚已往
闔閭死胥濤白馬浮塲葬街衢猶存專諸字千年寂
寞悲要離雄圖霸業黃池長石室君臣起會稽今古
佳人難再得夫差一死真如節吳宮花草誠已矣韋
白風流今遂稀東吳顧陸不可作范公益公名空垂
文定祠邊殘草白五人墓上松風吹我來獨酌南濠
月忼慨悲歌感舊思不知此意何所感鐘聲夜半寒
江湄

曉渡楊子江

澄江如練逐輕橈宿霧蒼茫木葉凋十里江聲浮日
月中流曙色辨金焦人喧古渡潮初落山過流雲雪
未消爽岸輪艍規製壯東南飛輓不知遙

瓜州望金山

奇絕金山寺洪波日夜浮鐘清奔大壑峯小學棲鷗
畫閣中天霽寒雲繞郭流故鄉東望遠縹緲對江樓

維揚旅店坐雨時將赴鄴訪毛會侯司李

寂寞邗關外西風帶雨吹
扃門簷滴近出戶晚烟遲
城遠行人少天寒櫪馬嘶
故交還鄴下何日慰深思
渡泗水

千里平蕪接泗州
盱眙東望最高丘
洪波浩渺連淮海
曲巷喧闐隔上游
驢背霜寒沙草路
鐵衣晴度木梁舟
磬聲十二今何處
禹跡茫茫萬古流

曉過靈壁縣

磬石衝寒路郊原宿曉烟
霜凝茅店白月照小城圓
擊火呼僮近逢人問徑偏
不知何所事迢遞趁殘年

宿州曉發

符離寒望酒旗開
纔解征裘引數杯
夢破隣雞行色早
霜侵棧馬曙光回
五更晴日浮天出
千里神河繞塞來
極目平蕪多沃土
何人屯種闢蒿萊

渡黃河

千里奔馳歷巨川
神河如帶接遙天
風驚寒雁穿沙過
日照荒堤夾岸懸
屈注東南流大海
灌輸西北擁雄邊
禹功旣遠隄防重
爭說宣房築漢年

其二

儀封渡口午烟橫
譚笑波瀾一葉輕
九曲原從天上

至千年誰使地中行奔流決濟漁舟小野日蒼涼雁
磧明鼓柁試歌清晏頌曆元不用改河平

渡河宿固陽集和壁間韻

黃河遙望隔銅臺落日天寒畫角哀記得故園春色
早香風亭放幾枝梅

其二

霜風策蹇問公車襪被寒侵一枕書鄉夢不來知路
遠客窓蕭寂歲新除

元旦曉行

椒花傳頌日猶自問征鞍僮僕歡新歲庭階積舊寒
思鄉因客久向遠祝親安遙望金臺路春風拂曉看
滑縣阻雪

客阻真無計新年雪滿途荒庭嘶立馬舊堡聚啼鳥
樹裊千枝白烟橫一縷孤寂寥誰是侶燈影伴殘沾
感雪

寒風一朝天下白彤雲漠漠留行客樹結冰凝千萬
條雪花如掌亂几席城烏棧馬相向鳴凍壑無聲日
已夕平沙曠野浩茫茫街巷更無車馬跡微見烟分
數縷青下者黃河上城驛呼童解橐市中沽天高夜
久杯無力浩懷落落滿燈前無端又復添新曆揚徐

梁衛隻身來關河千里嗟于役昂藏意氣喜尚存豈
真僵臥無良策詩成片片墨花飛醉擁寒光題凍壁

韓魏公祠

醉白遺軒棟宇修瓣香漠漠繞松楸華林無復王侯
第畫錦還傳宰相游十萬行邊輕頗牧三朝定策重
伊周岳侯身死公名立趙宋興亡倚相州

公與岳忠武皆相人

銅雀臺

鄴城佳麗已荒丘鄴下湯湯漳水流千古雄文曹父
子百年遺事漢春秋分香空泣銅臺月橫梁誰哀赤
壁舟莫向故宮懷往蹟寒烟寂寞使人愁

趙州道中

以下燕遊一

中

車馬勞勞古道傍遺踪看遍日初長趙州衲子仙橋
石赤伏真人鄙水陽中夜悲歌思祖逖白頭憔悴老
馮唐千年碑勒渾閒事翹首燕雲是 帝鄉

定州和壁間韻

春風驅馬向燕關却笑征塵滿客顏鼓筑何須悲易
水傾杯浪擬醉中山黃沙古戍行人少落日荒城暮
鳥還極目南雲天外遠夢回何處釣臺灣

中山旅宿夢中恍惚為詩記首二句續成之

客途容易曙明月照殘更策蹇尋幽夢聞雞逐遠行

帝城春色早親舍曉雲平別久無南雁憑誰一寄聲
夢里中諸子

結交十年餘何嘗輕試別杯酒論詩文情性久彌悅
無端事遠游所夢仍故業彷彿語石山峯峯皆環列
雜坐謀所歡豪呼猶未歇驚夢報隣雞悵然見明月
披裘逐馬塵野曠霜如雪

報國寺松歌

不知何年落松子常有烟雲從此起烟蜚雲結無冬
春虬枝古幹橫秋水雙松嶽嶽最爲尊外有七松近
相倚婆婆屈曲老龍吟爪鬚鱗甲鐘聲裏或如亂嶺
或如峯遠看側看無定擬長安二月春風多昂藏變
幻獨如此笑殺秦封五大夫何若四皓衣冠遊殿祀
松乎莫挾風雨飛長伴雲幢蟠帝里

被放南歸駱叔夜投詩見贈

十載聞聲隔越州相逢喜共鳳城遊碎琴都市終增
價獻賦長門漫典裘歸路已催行客早萍踪還幸故
人留殷勤紈素詩題處絕勝離騷散旅愁

王灌亭太史携樽過飲

退朝花底日初斜載酒欣回太史車小友忘年慚舊
譜名公折節重京華杯浮北海堪娛夜話到西泠始

憶家別後春風知幾許長安歸客柳方芽

晚泊天津

停橈喜對潞河平地擁津門總百城粟帛魚鹽通外
府山川風雨拱神京晴波日落千帆轉遠樹秋高萬
井明舟宿不須籌要害直沽南望已弭兵

夜過武城

片帆迢遞賦歸歎無計消愁數卷書風逐驚沙斜日
暗夜涼明月小城虛絃歌尚憶言公澤里巷空傳孝
子居坐久僧鐘雲外落夢回何處是吾廬

次臨清

不辭憔悴擁歸舟幾曲清淵古帝丘半載尚遲天外
信兩關偏向雨中留流分汶衛通漕路地扼東南識
巨州淹臥何堪懷遠道高譚杯酒暫消愁

南池追和杜韻

迢遞東歸路城隅憩小船遠亭含落日疎樹隱新蟬
駘宕鳧山月滄茫濟水天千秋遺句在留意舊青氈
太白樓懷古

濟州城邊河水綠女媧陵畔春如簇河水中分汶泗
流鳧山嶧山競相逐太白當年此地遊任城賀令交
方篤醉解金龜又幾秋相逢官閣浮醞醪潑墨豪呼

寫壯觀離奇勁絕無繩束下瞰南池濟水濱萬本垂
楊千樹竹杜陵留句憶青氈突兀碑題猶可讀西北
遺踪半已墟頽垣荒草牛羊牧此地池亭縹緲間猶
似江南山水曲我來三月春風生憑高縱望迴清矚
百年無地不山川腐骨陳陳等草木何幸齊傳李杜
名賀監許簿同芳躅水遠山高月滿天詩仙酒聖驚
庸俗山水由來不重人笑殺騶軒空碌碌何不偕登
太白樓齊魯江淮曠心目左呼子美右青蓮快譚劇
飲招黃鵠

五日富陽舟中小醉

歸途經兩月到此便如家雨隔桐江道榴開午日花
市醪酬令節薄醉語京華霽色明江渚峯峯隱暮霞

望岱

以下燕
遊二

岱嶽嶙嶙鎮魯東嵯峨帝座宛相通千盤磴道云亭
迥萬里樓臺日觀空小引諸泉開汶泗遙分片壁倚
龜蒙何時策竹凌霞頂縹緲齊州一望中

登玉皇閣眺望

峩峩宮殿頰諸岑下瞰輪蹄古道深檻外亂峯天遠
近日邊歸鳥樹蕭森驅車漫擬龜山操抱膝長懷梁
父吟極目甫徠松柏盡羊公碑字益沾襟

羊叔子故里

寒風漠漠馬行遲
荒草郊原太傅碑
無復鶴能娛客
燕誰言山不感人
思平吳事業成
千古緩帶風流異
昔時橫睇關河應
墮淚何須峴首始
啣悲

太學石鼓歌

不知鼓自始誰識所由來
文王宣王杳莫辨蒐田刻
石奚爲哉車攻吉日賡周雅
如何轉徙陳倉野金人
輦致辟雍門石鼓遺文鎮天下
岫嶠之碑岱山銘邈
篆冰書辨者寡形質離奇
噩噩然刪後無詩何必全
有字無字義相等賞識原在文字先

金魚池

如何燕市裏清絕似江東
曲度春帘外人行淺藻中
開軒驚鳥散畫畝飼魚紅
倚檻郊壇望亭亭入遠空

毘盧閣

層樓百尺俯西城
歷歷郊原望裏明
萬井烟霞環殿闕
四壇松柏擁神京
東流巨浸歸滄海
北倚雄關控紫荆
不盡河山堪寄目
邇來况復泰階平

隨主司午門謝恩應制

蓮漏初回聽曉籌
春風款款玉階游
晴雲半捲雙龍闕
旭日遙開五鳳樓
何策漫叅新仗序
有懷還憶舊

仙林齋集 卷三十一 九
瀛洲趨陪益信 君恩重露浥虹橋尚未收

太和殿對策應制

策試傳宣草莽臣含毫鵠立正芳辰風來寶鼎微香
遠日照采恩淑景新奏對漫言齊董賈酬時聊復擬
天人自慙家世承恩久又逐春光向 紫宸

太和殿賜第應制

楊柳絲絲起玉河句牘唱罷曉烟和南宮造士人都
雋北闕承恩望已過三奏雲璈環鐵鳳一時劍珮擁
銀珂歸途莫笑春袍濕自是 天家雨露多是日微雨

恩榮宴應制

宮花簇簇滿容臺詔賜櫻桃御宴開翠幕風輕分玉
饌紅綾春暖醉仙醅雍和座上夔龍彥師濟皆前輩
賈才歸去微曛斜勒馬都人指點曲江來

謁嶽廟

嗟峨宮殿鎖層陰祀首東方禮報深門號乾封還紀
宋碑殘釐祝尚留金岡巒萬疊支天地松柏千年閱
古今七十二君靈貺遠頽垣荒草亦何心

蒙陰

幾程星月岱山來小縣東蒙古道開拾得雲芝堪解
渴桃花溝畔且停杯雲芝蒙山茶名

越中懷古 以下越遊

山陰道上幾番留萬壑千巖一望收
內史流觴蘭渚月秘書投老鏡湖秋
夾城花竹聞歌管向水樓臺纜
畫舟安得移家分此地柯亭梅市四時遊

柯亭

越山清絕不知遙斜日寒村天沈寥
幾曲秋菱初出葉一灣野水欲平橋
家縣曾苦喧漁市塢繞烟嵐入
遠霄笛裏清音仍此地中郎何處竹蕭蕭

南華館

出郭風烟好晴波繞一園亭孤多映水
松老自盤根落葉紅無定殘荷綠有痕
蘭橈歸路近醉裏月黃昏

大禹陵

菊蘂凝黃汎小舟龍蛇古屋萬峯頭
塗山玉帛三千國安邑烝嘗四百秋
烏篆尚題秦歲月珪書空秘夏
松楸東樓王氣今何處華表蕭蕭帝子丘

謁禹廟

畫棟雕甍俯越州空山無恙篆烟浮
功成父子全君相績紀山河拜冕旒
窈石衣冠南鎮月梅梁風雨鑑
湖秋夏王明德由來遠江海湯湯正穩流

蘭亭

蘭渚淪漪落照邊風流曾記永和年詩成曲水人千古
花簇流觴酒半船秋老只疑春尚在客來正喜月初
縣賞心此日忘賓主可是豪遊似昔賢

西施山

嘗歎越君臣廿年匿羞恥甲首非不堅謀臣亦濟濟
雖云天授吳背城寧惜死如何意氣盡舉國託女子
葬光丈夫概忠智兩無以徒以家國憂辱身報構李
甘蒙褒姒名傾城豈待已故知沼吳功不應先種蠶
功成不策勳廟食豈終媿胡爲絕代下不聞祀彼美
苔沒館娃宮香沉若耶泚太息浣紗人寒鐘咽秋水

戢山

吳宮方采蓮越山還采戢采蓮苦不久旦暮沼城邑
戢亦薪膽類與越共休戚激楚雉主心忼慨羣臣泣
誰云戢無香故非蓮可匹莪莪戢山下臨風念疇昔
徐文長故里

東南戰績首中丞幕府才人氣自矜白鹿表成天子
羨誰言詩酒畢青藤

遊吼山十韻

吼山之奇非言可盡非筆墨可寫惟蕩舟出入洞
壑中浮白叫絕而已本名曹山爲陶太常別墅今

捐為菴余扁舟縱遊得盡水宕旱宕雲石之勝憾
康樂逸少諸公未及見此山開闢也

如何巖壑異疑是五丁餘百尺蛟龍窟千盤獺狢居

穿崖舟出沒到閣水縈紆觴咏陶公宅崢泓太史書

董宗伯手書崢泓二字刻石間宕仍分水旱人可坐樵漁佛屋松聲

繞茅齋竹影虛壁縣扶劍閣潭黑語靈胥突兀雲為

石縝紛鳥似魚自應呼米拜能不動韓歛奇絕真如

畫還知畫不如

歸次錢唐會侯以詩見東却和原韻

半舫新從禹穴還相逢幽意未曾刪秋冬之際同為

客書畫其中別有閒水宿亭臺花是岸門臨城市竹

為山名園不減王摩詰輞墅丹青數筆間

錢唐舟中夜坐

秋色催歸棹維舟此再停月明吳市白江隔越山青

估舫乘潮至漁歌出浦聽廿年曾宿處燈火正熒熒

泝新安江以下楚遊

秋雨俄千尺舟行喜漸平禾疇青出水樹杪綠棲萃

岫遠晴無翳沙奔細有聲青溪東望近渺渺晚烟橫

望小金山

浪擬金山寺萍浮較宛然石孤平似蓋山削碧如拳

樓閣臨江出杉松夾岸縣隔流頻寄目彷彿妙高前
景德鎮

窈折無如此江聲峭壁中村紅爨屋久春白石坵風
舟轉隨湍疾人閒理柁工秋深寒夜雨薄醉倚疎蓬

中秋鄱湖對月

湖光泱泱片帆閒秋色連天水一灣皓雪溶溶彭蠡
月青螺點點大孤山星懸北斗魚龍靜日落西風鳥
雀還最喜客遊當此夕匡廬縹緲白雲間

彭蠡雜詠六首

秋風八月湖水長萬頃溶溶接混茫極目遙天真一
色不知何處是鄱陽

其二

頻年僕僕走江河水濶滄茫此處多雪浪無聲舟出
沒榜人談笑唱吳歌

其三

白蔣依風菰米黃湖如晴雪月如霜孤舟宿處漁汀
晚雁帶殘聲過夕陽

其四

孤帆蕩漾舟如鳥野渚蒼涼鳥似人夜久不知天遠
近一湖倒影浸星辰

其五

片帆彭蠡過饒州秋水連天露欲流皓月明空千頃
白不知今夕已中秋

其六

雲埋大壑雨潺潺天遠湖空黯澹間秋日乍明浮五
老此回真得見廬山

望廬山

曾聞廬山高未識廬山面秋高彭蠡清彷彿中流見
烟蒙紫霄峯雨沒青牛巘五老割奇秀山山互隱現
我聞康王谷縣濤飛素練何時凌絕頂勝地幽尋遍
醉倚昭明臺閒穿白鶴院結社招遠公陶謝同清讌
支筇十日遊庶畢名山願

次九江

潯陽江畔古江州地扼荆揚接上游五柳舊傳陶令
里百花仍對庾公樓雲移廬阜穿天迥雨過巢湖繞
郭流安得遠師同結社樽前黃菊引清秋

賦得湖光與天遠

不知湖盡處曠絕似無邊浩渺迷歸鳥微冥認小船
雲多真易雨岸遠不分天落日蘆花晚漁歌出浦烟
黃州懷鮑明遠王元之蘇子瞻諸公

水遠山長環赤壁永安城外秋蕭槭雪浪無聲日夕
流蘆花荻花相向白不知何事感人思浩懷今古樽
前積叅軍作幕臨江宮梅花落盡留遺宅元之竹樓
喜尚存坡公雪堂倚寒碧孫曹往事委荒烟諸公嶽
嶽豐碑勒始知山水待人名人重山川還改色君不
見空山寂寞無知音怪壑奇峯終寂寂又不見昏昏
俗筆汚山靈繞屋碑題投瓦礫

黃鶴樓

風高鄂渚一帆遊傑閣稜稜俯巨流江漢中分秋水
澗衡湘西望遠山浮鳳皇峯外思千里鸚鵡洲邊月
一樓何事仙人騎鶴去題詩空讓左司留

登大別山

俗名龜山

山是何年闢龜浮巨浸中路危低漢柳衣捲立江風
千里孤帆落雙城一水通曠懷神禹蹟寂寞舊行宮
鸚鵡洲懷爾衡

魏武霸中原智巧餌俊乂蠅聚鄴中才營營競聲利
禰生氣非常網羅不能致當年作賦時奇文寓高寄
忼慨漁陽搥雄豪振天地文舉本知心黃祖昧大義
甘蒙殺士名坐快曹瞞志峩峩黃鵠磯江漢浩無際
芳洲不忍青傷心狂鼓吏

郢中懷古三首

周南澤國倚巴丘小舫乘風快遠遊
屈宋文心芳草合孫劉戰績大江流
章華臺畔千門曉絳帳堂前萬樹秋
聞說西山方罷戍楚歌非復舊荊州

其二

渚宮舊事渺難尋香井渟渟尚至今
江漢分流浮地肺鄖襄錯壤接天心
參軍雅韻龍山遠刺史餘風鶴澤深
安得詩成招屈宋陽春白雪郢中吟

常浮不沒天心山在鄖陽與荆接壤

地肺在荆西南洪水

其三

仲宣樓外草芊芊往蹟幽尋更渺然
杜老新居花落盡明妃舊里月孤懸
秘函無復黃金藏香草空留玉米田
極目平蕪何處問蕭蕭木葉滿江邊

遊太暉觀

明湘獻王建右即湘墓

霽色郊原外輕寒泛紫駟壇封三景秘閣倚一天
秋遠樹龍山盡巖城蜀水流王孫荒塚在蕭瑟暮雲愁

龍山

野寺龍山舊所傳涼風蕭颯正秋天
誰誇刺史桓元子却憶參軍孟萬年
古樹平岡棲落日遠村過雨辨炊烟
憑高寄目思無限蔓草荒臺益惘然

沙市望川江歌

蜀江之水瞿唐來驚濤觸石崩雲雷黃牛白狗遞險
 惡空舸明月猿聲哀黃牛白狗空舸舟出彝陵始平
 敞四十八灘次第開自荆以下會眾水沱潛沔漢供
 趨陪不知何為注於海如歸天府羅羣才枝在東南
 根在蜀吳艤川艦繁貲財沙市瀕江數十里當年歌
 舞連章臺江水不能救兵火死亡藉藉塗蒿萊故郢
 諸城牧駝馬頽垣剩礎寒江隈我聞此言增太息感
 悼不獨章華梅亂離聚散成今古江水湯湯何盡哉
 願挽江流洗兵革安瀾億禩無祥災

登觀音寺塔再望川江歌

浮圖突兀排雲起萬井荆南錯其趾平沙曠野樹木
 稀漫漫衰草連江汜江水奔流三峽來連州跨邑經
 於此老僧能話嘉隆年寶塔初成白龍徙到岸只疑
 塔在山江行望塔塔在水目高不知江大小千盤百
 曲鐘聲裏且烹江水拾江花安能溯峽通岷探其始

題桃溪漁子圖

石磴垂楊畔詩人靜似漁不知何所寄猶擁一編書

江郎山以下建遊附

何年五丁力割石便為三柱立支天地峯危宿雨嵐

仙霞嶺
止疑雲突兀寧復鳥窺探仙鯽還存否臨風憶石潭

仙霞嶺

複嶺層崖勢轉橫千峯絕頂與雲平路危似識蠶叢
異閣迥遙看鳥道明古木陰森微見日怪禽嘈雜未
知名丸泥不蔽三關險橫睇山河百感生

抵建州

危灘千疊走蛟龍江跨虹橋路幾重練母塋高開府
第梅仙祠近隱靈蹤童童衰草黃華谷漠漠齋堂白
鶴峯盡說狂氛經再創芝城非復舊雄封

留別建寧諸子

十年篝火墨成癡浪博浮名祇自疑意氣何緣來勝
集文章原自有真知先禪漫惜遄歸早高賞還憐會
晤遲珍重東南皆美箭仙霞凝望一深思

舟雨望武彝山

停橈谷口倚斜曛仙窟遙瞻便不羣雨宿大王峯下
路山連玉女嶺頭雲離奇峭石千巖合紆折澄流九
曲分剩得霞漿堪待否會須酬唱武彝君

鷺湖書院

秋陰瑟瑟路偏難風雨鷺湖憩午鞍僧院鼓鐘新歲
月講壇逢掖舊衣冠傍山墦影穿霞出夾道松聲入

座寒朱陸源流原自合漫將當日異同看

山公陳詩靈紫華外不曾於兩山元發歎

遊山巖王文巖更雲巖百千嶽合孫徒登嶽大

詩詩谷口尚餘鯁山嶽嶽與不羣雨窗大王峯下

俱雨望瓦礫山

部數冬重東南皆美備山嶽嶽望一眾思

集文章鼠自首真味愈乾巖巖早高賞巖巖會

十羊筆火墨丸巖巖巖巖巖巖巖巖巖巖巖巖巖巖

萍留草序

李唐一代詩人首推杜少陵然而少陵踪跡幾半天

下歷江山拾橡栗其詩境佳處多在兵車戰馬間流

離播遷詩益工妙睦州方渭仁先生萍留草一集皆

避難杭州時作也浙閩相持烽火逼睦州萑苻之徒

所在竊發先生不得已去故園卜居會城遂得與吾

郡諸君子時有倡酬槃敦之末往往俾予托跡焉先

生學瞻才敏性坦率無畛畦門外求詩者踵接率能

厭其歡心而去又雅自好吟諷凡湖山登臨讌飲雨

窻月夕鳥啼花落之時酒闌夢醒之候無不于詩焉

寄之篋中稿纍纍成帙一日顧謂予曰吾自播遷以來流離困頓固已身如萍寄其又安忍使吾詩嘆飄零也子其爲我序而輯之夫草木之精上爲列星今之萍其星之精乎賢人君子流寓一方輒能轉移風俗近操觚家視先生若斗極然留此一編安和祥雅直可黼黻太平豈止與西湖歌舞聲相爲映發也哉吾見墨光射處能令兵氣俱銷回首故園恍如夢寐不須再賡長鏡白木柄諸詩矣是先生之樂過于少陵里門夜開不廢歌咏吾于萍留草卜之仁和

王暉丹麓譔

健松齋集卷之二十三

遂安方象瑛渭仁著

萍留草

携家武林吳慶伯留飲喜值徐大文諸子

烽火驅人又遠行故鄉西望羽書橫暫憑山水閒心
夢却喜文章集弟兄劇飲半軒寒夜永快談千古旅
愁輕西泠舊是萍棲地重與諸君續勝盟

湖望

霽色催遊屐澄湖一望開鐘聲花外落舫影鏡中來
院古行人少烟分暮鳥回頻年山水約此際勝啣杯

燈集酬盧西寧

浮家千里傍江城猶喜燈前集弟兄豈獨杯觴留古
意亂離誰見故人情

其二

頻年烽火嘆無家隔院香風感歲華聞說園林樵採
盡有誰貰酒共梅花

清明

段橋楊柳杏花天寒食村村展墓田越女新妝扶繡
輦吳兒貰醉擲金錢松楸影裏喧歸騎簫鼓聲中纜
畫船惆悵鄉園三載別臨風杯酒獨潸然

渡湖

嚴寒誰復此湖中古寺南屏一徑通十里芳堤衰草
白六橋晴雪野梅紅波光漠漠搖孤艇塔影蕭蕭入
遠空當日杏帘何處問畫樓顛顛馬蹄風

徐武令納姬詩和韻

鸞鏡塵封憶斷香明珠十斛買新妝鹿門他日還偕
隱笑指星光學月光

毛稚黃招飲

揚亭咫尺喜頻來霽色輕寒一舉杯三世舊交偕令
子令婿徐華徵俚百年良會集羣才時長君樽傳永

健松齋集 卷二十三
夜寧辭醉話向殘冬欲訊梅快絕清歌還二妙管絃
吹徹鳳凰臺鳳凰臺毛子自度曲

吳山道院小飲

無計銷愁緒欣從小院遊江迴千嶂合塔迴兩湖秋
薄醉還遲雪孤懷半倚樓干戈仍故里僥倖此間留

其二

舊遊還此地寂寞有孤雲萬井峯前集三山海外分
風微香篆裊壇靜午鐘聞小醉扶歸路蕭蕭鸞鶴羣

秋集湖舫

風清殘暑段橋邊偶爾登臨意澹然最喜琴樽後別

浦誰家蕭鼓盛樓船遠山明滅靈峯寺半沼滄泓六
一泉快賞更忘歸路晚芙蓉倒影正秋天

哭陸左城

少日湖遊便識君爭傳小陸最能文寄懷每隔錢唐
月作賦新裁鄂渚雲亂後文章思舊好歸來詩酒話
離羣劉蕢下第相如死惆悵江門對落曛

五日旅懷

無端烽火悵移家半載西冷旅夢賒乍對新蒲驚節
序漫憑杯酒話天涯書來已盡牆東柳客久還看午
日花不及巢梁歸燕子將雛時傍夕陽斜

登吳山眺望同張用霖應嗣寅陳際叔沈甸華
陸梯霞毛會侯

覽勝同過伍相臺青槐小閣暫停杯雲移越嶠千峯
見樹簇江城萬井開對酒喜看耆舊在懷人便覺旅
愁來故園西望歸無計落日層樓畫角哀

閏五日同人大集陸蓋思巢青閣分賦

出郭風烟半舫來巢青高閣雨中開蒲殘更競西泠
渡花霽重逢北海杯地接湖山供雅宴人聯吳越集
羣才自憐客久縈愁緒肯惜樽前數往回

思古堂雅集分韻

讌遊誰羨畫圖看此夕飛觴旅夢寬詩酒喜從千里
合烽烟猶剩一宵安清尊潦倒華筵敞雅曲淒迷玉
篴寒星斗半斜殘醉後蕭蕭零露滿闌干

釣臺舟中坐月

經年烽火故鄉回落日西風傍水隈遠樹蕭涼臯羽
墓寒烟寂寞子陵臺虬籐倒影看雲過細浪無聲帶
月來欲覓村醪酬夜永荒亭百尺冷莓苔

毛學博齋中觀荷

誰言苜蓿冷雕闌雅韻偏宜入座看舊種芙蓉紅到
閣新栽竹樹翠成竿亭臨野水題詩遍秋近江城帶

雨寒半載浮家空故里從君喜值一樽安

遙和初秋集稚黃思古堂作

一天涼月正秋宵旅病無端臥寂寥聞說主人能醉
客十行新咏擘芭蕉

和丁素涵雅集韻

空庭葉下露新流河漢微雲一抹秋遙美題詩燒燭
夜茫茫鄉思倚高樓

渡湖訪龔仲震

好友經年別重來旅夢中亂離憐我在憔悴與君同
親友音書少園亭駐牧空愁多無可語惆悵藕花風

酬句公餽茶并讀逸菴詩稿

逸菴古詩人蕭然獨高寄少從宿德游書卷通禪意
結茅傍江門閉戶絕塵累賦詩寫孤懷元音疑未墜
嗟予困亂離浮家此暫憩百慮逆心夢昏晨計珠桂
從公竟日談頗覺豁胸次今秋桐江歸傅公折柬致
詩刻已成編龍團足清味啜茗讀新詩恍惚發幽異
西湖兩山中諸老多禪契若訂蓮社約應有淵明至
將赴吳興宿王丹麓霞舉堂次日舟中讀雜著

十種却寄

霞舉堂前落早潮呼船送客拱辰橋隔江招手重來

約別思盈盈入夢遙

其二

丹楓翠竹影高隄
畫舫輕搖日未低
十卷奇書方罷讀
不知舟過伍林西

吳興懷古

輕寒偶逐鷺鷗羣
茗雪雙流一綫分
高士至今傳魯望
詩人自昔重休文
開軒試醉烏程酒
望遠愁看笠澤雲
前代池亭荒草沒
顏蘇遺事不堪聞

其二

晴江如練片帆閒
黃菊籬開第幾灣
畫舫輕盈餘不水
層巒迢遞道場山
碑殘墨竹寒鐘外
石隱窪樽蔓草間
惟有烟波狂釣叟
五湖三泖未知還

宿舊館

水國滄茫裏猶傳舊館名
人歸疎柳岸山度暝鐘聲
繫纜驚魚散推篷候月明
徐常留戰伐何處問行營
自茗水赴禾舟中作

纔過南潯近溪橋更向東
雞聲桑徑裏人語荻花中
村古絲爲市流分路轉通
吳音還彷彿相對說年豐
題止飭上人像

滿架圖書一徑幽
丹楓黃菊引高秋
道人獨坐渾無

事醉倚松根泛雪甌

止飭手寫藏經性嗜酒藏各人詩畫甚富

其二

寫罷華嚴托醉鄉
叅禪學道總茫茫
畫圖識得西來意
蜺子何妨是酒狂

福城寺

緣橋野徑菊花黃
塔影層層出上方
妙相舊傳吳道子
榜題新勒米元章
晴波數曲通禪院
古樹千年護講堂
聞說懺壇多宿德
篆烟縹緲禮空王

茗帚菴訪梵林上人

畫舫隨流轉
高人萬竹中
題詩來夜月
貰酒聽松風
快賞書千卷
孤懷菊幾叢
虎溪留別處
清絕與誰同

泛南湖

橋李城邊日未斜
鴛湖晴色泛蒹葭
輕橈出浦纔分浪
遠樹凝秋盡學花
夾岸園林聞唳鶴
凌空堦院落歸霞
不堪烟雨樓前望
衰草頽垣起暮鴉

送內弟吳孝廉北上

十年曾共鳳城遊
車馬勞勞又幾秋
豈謂冰霜淹驥足
應知風雨護龍頭
雲峯夜永披緗帙
上苑春深泛紫騮
此去捷書先到我
爲君貰酒醉杭州

又

別思盈盈逼歲除弟兄千里共萍居每憐王粲歸無
計猶喜元龍氣自如烽火不須縈遠夢文章原擬重
公車年來宵旰焦勞甚三月春風早上書

戲題相思鳥

翠衿紅距影雙清笑殺鴛鴦祇自名莫向雕籠看比
翼引人幽恨不勝情

其二

翩翩年少正情多偏愛文禽挂薜蘿爲問鏡鸞雙舞
處風流較此更如何

雨中王仲昭招飲

時初春五日

不辭折角艤扁舟遠色空濛尚未收野水寒添高閣
迥桑畦春護草堂幽辛盤五日遲梅信華燭三更散
旅愁猶憶斐園酬唱處聞樽又向雨中留

飲姚生書閣

輕寒偶赴桂山來金谷華筵次第開入夜傾樽頻到
客凌晨投轄更啣杯遠山霧捲還疑雨高閣春新欲
放梅薄醉渾忘歸路好西湖晴棹一舟迴

大集教忠堂觀燈分得十一真

關西門第喜猶新好友東南集主賓燈敞華筵偏待
雪梅開高閣已分春縱譚真勝書千卷雅韻還宜酒

數巡却笑年來湖壑宴扁舟常是雨中人

河渚探梅酬佞公

探幽曾與遠公期古蕩春深畫舫移瓢笠千山還此

地雲溪菴公初學道處也文章四海憶當時公初執贄先烹泉

更赴尋梅約攬勝重過說法池快絕高談酬夜永鐘

聲半榻雨絲絲

重過靈隱寺

古寺湖山最相過已昨秋每懷靈竺夢喜逐鷺山遊

說法逢支遁題詩憶貫休白蓮如結社期我萬峯頭

其二

三竺曾遊處浮生二十年講堂看鳥下梵閣有燈懸

夢繞譚經石心依洗鉢泉暫來還別去惆悵雨花天

飛來峯

澗壑仍無恙重來意渺然危崖棲古樹怪石俯流泉

塢影穿霞出人聲隔洞傳何時招米老狂拜此峯前

臯亭泛桃花

何須更覓武陵源雲錦千株別有村野水通船遙舊

陌林花過雨漲新痕偶然倒影紅生浪到處聞歌綠

滿樽勝地良儔真不易歸扶殘醉向黃昏

同會侯家雪岷兄過稚黃

十日江城雨郊晴春已深每懷燒燭讌爲訪讀書林
臥病耽奇字幽居愜素心故園歸未得乘興好相尋
送毛會侯赴補

孟夏草木繁送君西陵道馬首指燕雲金臺禡正好
同學少年儔著鞭君最早吏績著雍梁迨歸就已老
相携話舊遊亂離逆懷抱遷播歷險艱竄伏依叢篠
共宿聽鳴雞勞人誠草草百口虎穴來萍棲同潦倒
銷愁託楮豪古今恣搜討詩文每竝題出入共昏曉
嚴陵二子名頗溢湖山表繫予嬾且疎旅愁憚勞擾
長卿願爲郎四壁還悄悄喜君匡濟才驤騰雲路矯
努力事簡書相期意非小

梁冶湄明府招集湖舫

六月涼風畫舫開藕花香處傍亭臺官閒自署西湖
長客到常傾北海杯白恰高談雲外落紅牙度曲鏡
中來通門數載相依久不羨登樓作賦才

新秋旅懷和韻

無計銷愁只掩扉驚心節序冷絺衣最憐客裏韶華
易尚憶山中白羽飛蟬噪高梧情自切烏啼明月夢
空歸故園記得秋光好松竹樽前翠滿圍

錢武肅王祠

江海當年王氣分，荒祠猶對兩湖雲。
誰令閩左弭兵革，不向中原策戰勳。
四代冕旒丹篆字，千年碑碣錦衣軍。
霸圖銷盡雄風在，萬弩潮聲日夜聞。

八月十六日蓋思丹麓招集茂承堂分賦

幾番出郭不知遙，喜有良遊慰寂寥。
千里賓朋同勝集，頻年詩酒醉清宵。
入筵霽色秋過半，隔院香風桂

未凋猶憶去年霞，舉宴聯牀疎雨正今朝。

去秋是日丹麓招集

霞舉堂同人皆阻雨不至余與家文虎暢飲留宿

集顧嚮中復堂分得十四鹽

高齋爽氣滿雕簷，勝友招邀逸興添。
桂落餘香風細細，堦橫秋卉影纖纖。
飛觴雜坐看流水，待月閒吟捲畫簾。
何必罰依金谷數，登堂原擬各分籤。

昭慶寺尋蔣馭鹿不值

如何寂寞午鐘聞，空憶當年白練裙。
處士宅邊無便鶴，歸來惆悵兩湖雲。

吳山遇陳際叔馬鳴九小飲

秋霽尋山頗未遙，故人貰酒便相邀。
管絃嘈雜知何意，目放千峯聽早潮。

徐野君集二十四番花信分得山茶風限二冬

韻

金鈴閣外影重重嘉樹江南別院鍾翠捲犀稜看葉
勁朱翻鶴頂識花穠卷舒豔質春前見搖漾仙葩雪
裏供自是海紅方應候輕寒載酒一相從

西陵咏古

屬鏤賜後血猶腥第一吳山尚有靈白馬銀濤千古
恨至今愁對越山青

其二

宋家宮闕黍離離遺廟錢王尚有祠烽火只今誰保
障可堪苔蝕表忠碑

其三

廬陵原未汎湖船勺水還呼六一泉百代忠魂碑碣
聚可知人自重山川寺前為六忠祠祀明末殉
難六公今通祀前代名臣

其四

孤山只合屬林逋千載何妨侶白蘇惆悵後來無計
遣應携梅鶴去西湖

其五

雙墳嶽嶽壯湖湄斷碣頽垣亦可思却笑奸雄同不
朽太師金鑄鄂王祠

其六

勤王信宿向皇都得勝還聞父老呼不是跨驢歸去

早身各能勝岳侯無得勝橋在湖墅韓

其七

半閒堂外草初黃秋壑無聲冷佛場葛嶺至今鳴促
織風流誰是老平章

其八

祝釐祠廟草茸茸遺像還聞是理宗太息髑髏銷飲
器都人猶覩舊時容像在佑聖觀

訪顧茂倫

窈折虹橋路高齋一徑幽圖書分四壁刪定寄千秋
徵士陶元亮詩人沈隱侯相携未忍別夢亦為君留

虎丘感舊

輕橈偶趁菊花風僧院樓臺漾遠空七里荒祠誰短
簿千人講座有生公亭連鶴澗秋光冷石倚愁泉落
照紅猶記十年絃管夕詩成酬唱月明中

吳門遇徐松之

懷人曾泛剡溪舟聞說囊詩向虎丘廿載著書依北
寺頻年清夢繞南州萍蹤喜接千人石豪賞誰誇百
尺樓我欲與君同載酒吳江楓落正驚秋

題袁重其負母看花圖

古今浪說老萊衣白髮肩承此更稀母病不知身已

老若榴花下映春暉

其二

蒲酒承歡理亦常
花前負母正端陽
孝思雅韻誰兼
擅笑指庭萱引數觴

酬宋旣庭見過

白髮干戈裏浮家托酒樽
十年懷宋玉一棹過吳門
患難憐吾在詩文喜共論
別君非太促歸夢向山村
尤悔菴過訪并讀新製清平調雜劇

偶泛蘭橈問虎丘
奇文讀罷正深秋
但留詩卷成千古
莫笑今生不狀頭

其二

春風人自豔臚傳
誰信龍頭是謫仙
若使三年真太白
也應不負杏花天

蔡九霞留飲卽席言別

如何秋色裏征棹往來頻
正苦浮家久應憐作客貧
文章吳下最詩酒故人真
爲訂重遊約蘇臺及早春
抵杭聞入閩捷音

寒霜吳越路僕僕亂離中
何意丸泥險重看正朔同
廟堂寬祝網閭井集驚鴻
最喜鄉園近歸裝任好風
喜歸

飄泊真何故依人祇自憐烽烟存八口珠桂歷三年

客久添衰病愁多託簡編歸期今日遂松竹諒依然

渭仁詩如繁林春暖花鳥雜飛更有層軒連閣碧
檻綺窻參差廻帶其間足使覽者神迷目眩又如
天寶詞人身經離亂雖飲酒歡歌終不發崎嶇飄
薄之感西陵陳廷會

渭仁詩清蒼蘊藉又時能出豪宕語色理入古機
杼逾新古人中當求之摩詰浩然之間唯其有之

是以似之其渭仁之詩之謂乎余久病臥渭仁時
與家會侯相過濁酒鮓菜以佐談笑渭仁詩以紀
之遂使僕名字亦附千古操豚蹄而得甌窶滿溝
僕之願慰矣幸渭仁不作淳于生大笑耳真一快
也錢唐毛先舒

都門懷古詩序

若夫五陵南去地入中原三輔西來河衝北戒軍都

蒼莽金遠則處處斜陽碣石沉雄燕趙則年年蔓草

一城木葉霜未染以先紅萬里邊牆月既沉而愈白

井上之燈忽紫蒯子難逢市中之筑空豪慶卿安在

于是金笳夜噉和以曼聲鐵騎晨嘶雜之長嘯揮毫

颯沓山迴故國之篇潑墨淋漓火入荒陵之句人則

欽欹而歷落俗原慷慨以悲歌金颺蕭屑偏帶商聲

秦缶高涼最合西氣嗟乎上客端憂正奉倩傷神之

後故人工病亦安仁悼婦之餘古今大矣何須代往

昔以興愁賢達紛如奚事向關河而寄慨君如不樂
請高吟蟋蟀之章僕尚能狂願緩進鷓鴣之杓
康熙辛酉秋日宜興陳維崧撰

健松齋集卷之二十四

遂安方象瑛渭仁著

都門懷古詩

黃金臺

金臺有三二在易州一在朝陽門外歸然土阜

荒臺百尺草芊芊往蹟空流易水邊駿骨自能招國
士黃金豈足致高賢樂生不去終收莒刺客何人遂
滅燕辛苦築宮師隗意寒鴉啼斷夕陽天

易水

一時忼慨去紛紛易水流寒不可聞鼓筑未能酬太
子刎身空使失將軍平沙浩渺鴉啼樹落日蒼茫雁

沒雲燕市酒人無覓處霜風愁絕和歌羣

蒯文通墓

通有書八十一篇曰雋永○居人常夜見通從二童携紗燈至井汲而返

當年狙詐委荒丘芳草孤墳尚可求
王氣應知歸漢祖奇謀原不負韓侯
書傳雋永人誰問憤到徂狂死未休
鳥盡弓藏千古憾寒燈井上夜深遊

樓桑村

中山遺胄本梟雄羽葆依然帝子風
肯以偏安留漢業可知全力限川中
三分兄弟功名盡萬古君臣廟貌同
車蓋童童空故里至今惆悵永安宮

張華宅

固安籍有張華里明末縣令重其姓諱更名張賢○墓在蘆溝橋東南廻城

廻城墓道近何如彷彿張賢憶舊居
匣劍已先都督去井欄猶記太康初
平吳事業埋荒草經國文章冷廢墟
鐵硯麟毫三十乘空從博物想遺書

酈亭

道元巨馬河自注先世樂浪府君始徙此○浪平聲亢平去二聲

古道燕山氣杳冥樂浪家世已荒堦
溝承督亢雙流合路接樓桑一樹青
斜日半沉先主廟平沙誰辨故侯亭
蒼茫典廢空悲感驅馬前村讀水經

狄梁公祠

祠有臺曰景梁○柳林蟬噪行其下語不得聞

景梁臺畔柳森森蟬噪荒祠落日陰
馴虎只今猶吏績北雍當日已君臨
賭裘漫許禡奸易正笏空聞積

念深不是五王能薦用古今誰識老臣心

劉司戶祠 昌平州學內今圯董宗伯其昌曰
蕢已追贈諫議矣稱司戶存憤也

殘碑何日出蒿萊司戶祠堂此地開韋布憂深天下
事治安書奏賈生才抗言豈藉登科重落鬼空聞射
策回却怪芻蕘偏切中左廳甘露總堪哀

賈島墓 李洞好島詩範銅
事之呼賈島佛

長江碑碣盡荒荆丘里紛傳賈島名誰更推敲吟字
瘦空聞酒脯祭詩成微官蜀道啼猿急故國燕山返
照橫莫悵無兒窮主簿範銅已足慰平生

楊令公祠 在古北口業戰死陳
家谷此其行祠也

寰朔城邊殺氣豪行祠颯颯擁旌旄黃沙白草三關
壯鐵馬銀戈百戰勞報國自知非力屈捐軀終不掩
功高竟來何處楊無敵遺憾當年濺血袍

文丞相祠 祠在今國子
監卽柴市

偶向橋門策馬過荒祠柴市近如何零丁洋裏軍聲
死清冷泉頭血淚多未許黃冠尋故里可能赤手挽
天河雲中木主渾閒事剩有千秋正氣歌

耶律丞相墓 祠改爲菴像以石尚存
公晚年自號玉泉老人

廣寧祠墓重燕山身繫安危不可攀萬卷圖書傳相
業一生涕淚爲民艱碑殘古字鐘聲外石冷遺容蔓

草間惆悵當年無限意玉泉何處水潺潺

廉文正公別墅

墅名萬柳堂即今豐臺居人種芍藥為業

別墅何年蔓草寒豐臺猶記舊遊觀時平不盡登臨

興客到都忘禮數寬萬樹清陰空往事千家紅葉滿

長安城東近又垂楊好今古風流許共看今相國益都先生築

園都城東亦名萬柳

徐中山將臺

明高帝賜第鍾山額曰大功

薄伐當年到朔方高臺指顧定興亡先聲曉奪風雲

色兵氣秋搖日月光夜半北門逋舊帝異時南面拜

真王大功第宅今誰主落木蕭蕭冷戰場

姚廣孝墓

佛法兵機未可論深謀已負孝陵恩金川不復知君

父鐵券原非計子孫跌坐功臣陪太廟侯封釋子壯

宗門西山亦有南歸衲孤冢誰哀萬里冤

于少保祠

無端土木遂蒙塵手挽艱危不顧身痛哭南遷迴白

日經營北返泣青燐八年力盡奸諛計一代功高社

稷臣熱血不知何處灑錢塘回望益沾巾

夫敘交則情牽酬酢詠古則感寄遙深顏之五君詠謝之鄴中八首尚已即杜陵詠懷古跡其勝投

贈諸篇良多也渭仁睥睨古人欲兼曩作蘊情發藻照古籠今近當為廷禮之編收遠亦歸詭室之

品賞宛陵施閏章書世多以少陵詩敘述時事感慨流連謂之詩史予以為不然史家之體必具褒譏予奪不僅敘述為工要當以三分割據萬古雲霄如咏懷古跡中語肝衡論列使古人心事如見始足稱詩史耳渭仁先生擅班馬之才珥筆石渠暇中取金臺故跡各為一咏於憑覽之中寓懲勸之意蓋所謂溫柔敦厚而兼之屬辭比事者詩史固當如是不僅火入荒陵之句徒為憑弔已也陳子昂薊丘懷古六章五言短篇而有不盡之致先生諸作雖激越奇宕仍渾深淵雅絕去議論之痕可以媲美子昂後有繼而和者知瞠乎其後矣溫陵黃虞稷自唐人早朝諸作盛行於是輦轂之間凡有吟咏不得為凄凉感慨語無論佩笏垂紳者自寫其冠服雍容之度即負書躡屨者亦曲擬以聲色綺麗之詞以為非是則與王居之壯都邑之富不類也雖煌然傾聽於已之性情何渭仁先生翰林閉戶著書時望甚重乃復求之古人以發其論世知人之意所為都門懷古詩音節壯涼寄託高遠直欲橫視一世彼縛響繁聲對此能復以雄麗自詡

耶京洛之詩當為之一變矣前東萬言

先生曩經潛水登龍山尋章華廢址俛仰眺聽長歌短篇流傳荆郢震時浪遊豫晉不獲躡屐以從及讀秋琴諸集即閒情細境以抒忠愛激昂之旨托山川鴻雁以緬友朋道路之懷幽思雋氣時裏筆端風人溫柔敦厚遺意得其深矣今年春疲驢短褐逢先生十丈輓塵中出都門懷古詩流連感興蒼涼豪健擅初盛唐之場風颯颯洋洋格屢變愈上安能測其所際哉潛江朱載震人處斯世欲憑弔昔人非確有鑒古之識雖句雕字琢終無益耳少陵丞相祠堂一詩論者猶謂末二句意旨太露不知古人實有是情得乎古人之情而詩至矣詎以格調拘耶渭仁先生都門懷古諸作感嘆流連則寫新亭之涕悲豪激壯如聽漁陽之撾舉古之賢王功臣志士文人皆能悉其生平中其隱曲得乎古人之情而止故無事於縛肯星稠繁文綺合也先生真尚論才哉西陵俞珮蓋聞賦詩徵志消壘塊於長言弔古憶懷紀興衰于寸管禹錫白門之詠感情乎鐵鎖樓船義山邗上之吟致慨夫垂楊螢火呼生賢而欲訴投騷申

去國之悲指儒雅以為師編且寫憑軒之恨未有
 瀛洲上客馳逸興于秋原賈文班寄閒心于春
 草吾師遂安先生奇跡金門怡情玉局文堪賦雪
 久傳名苑之題才可凌雲早奏上林之賦藜光燃
 五夜但恨古人不見我不恨我不見古人蓬島湖
 千年遙憐後日之視今亦如今日之視昔借叔子
 峴山之涕登臨薊北芳踪假令威華表之呼憑眺
 關南遺蹟荒臺蔓草當年鐵馬金戈廢址頽垣此
 日桑田陸海惟有文章可慕汗青編不盡之書節
 義堪傳塞紫表長存之石用敷鴻藻何殊光祿五
 君輒付魚箋可續少陵八首光搖東璧價重南金
 敢明培塿之私用贊琬琰之瑞桐城受業馬教思
 拜識

倦還篇

奉 假南歸真定夫子賦詩贈別依韻奉酬

七載貧官味歸裝祇做書無才謝簪綬有夢寄樵漁

衰病人先老周旋計實疎故園松菊在高臥記吾廬

其二

珥筆慙無補非因戀一官愁多侵白髮病久逐輕寒

敢道還山好應知入世難追隨何日是歸夢息驚湍

偶成

鴻鵠集丘澤矯矯雲霞姿朝挹天池露夕宿喬松枝

毛羽不自匿稍為當世知携持樊籠中顧眄生光輝

俊松齋集 卷二十四
六
旁觀競嘆美局促恒自悲一朝振翮去江海恣吾之
放游適心意任運復奚疑

述歸

晨出春明門曠漭豁胷次曖曖遠村烟松蘿鬱蒼翠
數載滯京華微官媿高寄今朝倦眼開卿心偶然遂
於世既無營此心更何累放浪天地間秋水澹無際

其二

官寒真似水三載困沉疴殫力竣前史昕夕窮蒐羅
一病苦怔忡綿延久未瘥前年奉使命力疾趨岷峨
往返二萬里展轉鬚髯皤參苓等餽粥薄宦當如何
微軀委京國中夜長咨嗟朝叅有常期職業在編摩
病夫糜廩祿媿惕良已多投牒請休假 詔許歸蓬
蘿生還實天幸游目放江河心閒氣亦靜稍覺神理
和乃知麋鹿羣性本狎巖阿

其三

驅車戒晨發有客思攀留旦晚便遷陟何不停軒騶
主人敬謝客感君意綢繆仕宦若行路倦足宜歸休
營營嗜進心昏暮誰肯收知足乃不辱古人慮實周
保身許明哲完名繼姱修胡爲久戀竊中道來悲憂
吾將返初服高臥白蘋洲

其四

回睇燕山道丹闕亘中天報稱頗未易七載糜金錢
迂儒濫科第薦辟厠諸賢承恩侍從班稍喜舊業傳
文章竊時譽祕閣留簡編瀛臺飫燕賚錦綺賜華鮮
空羣致冀野杞梓收三川家聲幸未墜臣職偶無愆
昔賢戒知止衰老計歸田寄謝金閨侶逍遙適餘年

其五

家園亦何樂夙昔困清貧負郭鮮百畝第宅誰經營
窮愁諒不免何以適中情顧憐旅病久決筴謀歸耕
團圞聚孫子情話邀弟兄山川自清麗松竹羅軒楹
扃門謝干請公府無姓名十年籌桑梓詎肯喪生平
賞心得其靜澹泊何所櫻悠游度年歲未擬學長生

潞河舟發

拙宦貧兼病君恩許放歸閒心倚征棹真得遂初
衣

其二

一水南流便乘風畫舫開還鄉今夜夢先過子陵臺

阻風

才試南歸棹驚颺蕩遠空鄉心輕萬里一任石尤風

紅葉

丹楓兩岸明一棹秋光裏落葉滿長安那識紅如此
舟行

曉色明江渚西風漾小舟帆移紅葉近岸轉白蘋秋
隔渚通漁艇晴窻引櫂謳倚闌新月上霜氣薄征裘
夾馬營

點檢香生夾馬營華山早已快昇平黃袍禪詔陳橋
驛夜半欺人說漢兵

聊城

七十齊城盡返燕聊城拒守亦經年射書忽倡東遊
計排難空聞魯仲連

南旺

誰將一水劃分流須信人謀卽鬼謀千里河淮真不
易年年飛輓到通州

牧豎

放犢閒眠芳草洲垂楊一帶對清流江村日暮還歸
去不用南山學飯牛

漁翁

打魚換酒足平生高臥猶嫌釣利名却怪渭濱閒老
叟盈頭霜雪更談兵

野老

村庄播種隴雲平野老扶藜悅晚晴道是秋霖添數尺今年黍地未全耕

重過濟寧以病未登太白樓

高閣凭臨二十年重來霜鬢遂蕭然山川應笑人衰老晝掩篷窗濟水邊

其二

乞身幸得遂南歸無那登臨處處違多病自知筋力倦餘年只合老荆扉

老僧

野水奔流白鷺飛老僧扶杖磴雙扉柳陰坐眺渾無事還向南窗補衲衣

徐塘口書事

曉發徐塘橋乘風捷如驚帆檣啣尾來舟行忽已住橈柁膠不前篙師失其據滄茫野水中往往見高樹驚颺蕩遙天洪波競吼怒隣船各譟呼欹斜隨所遇野泊兩岸空夕陽墜昏霧囊錢問小舟張皇未肯去老翁頗近情鄉導資所助爲言秋雨漲狂瀾夜奔注徐邳數百里漂流不及護魚鼈游原田中達宿鷗鷺當年禾黍疇是君阻舟處陵谷方變遷人事多錯互行役恣鹵莽豈得免膠固牽船隨之行趨避各有故

便林齋集 卷二十四
紆迴七八盤恍然得舊路始知智力窮師心每貽誤
自用不用人躊躇空四顧

宿遷

霸圖銷盡八千兵落日荒荒下相城千古興亡原不
少傷心四面楚歌聲

重過宿遷

猶記驅車六月天歸帆又傍濁河邊無端衰病催人
老迢遞關河又一年

其二

數載勞勞逐曉程鍾離殘月尚分明從今歸去桐江

道已自風塵老半生

黃河舟中微雪

鍾吾乘曉發寒雪乍霏霏亂點蘆花白時兼鷗鳥飛
隨風沾細浪帶雨上征衣隔岸看漁子呼船換酒歸

崔鎮阻風

浩淼黃河曲微風靜不波忽搖紅葉岸已度白羊河
濁浪兼天湧寒鴉掠水過孤舟當夜永頓使客愁多
度淮和洪昉思贈別韻

半生踪跡總淹留衰病催人返舊丘今夜淮河看北
斗珮聲猶記鳳池頭

其二

幾篋殘書伴客身宦游還較昔年貧故園松菊應相
笑七載寒官一病人

韓侯釣臺

垂竿當日困蒿萊烏盡弓藏更可哀漫擬勳名師尚
父何如嚴瀨子陵臺

漂母祠

荒祠寂寞喜還存終古難酬一飯恩却怪知人蕭相
國甘隨牝雉負王孫

露筋廟

一死流傳事若何露筋祠廟俯江波貞魂夜夜秦郵
道怪殺春遊士女多

揚州

幾番曾趁廣陵潮望裏空傳廿四橋爲訂明年春事
好平山堂畔聽吹簫

董公祠

天人三策董江都千古文章屬巨儒漠漠瓣烟祠廟
古滿階霜葉晝啼鳥

答鄧孝威見贈和原韻

多病承恩許放歸十年今喜遂初衣懷鄉偏隔黃

後村齋集 卷三四 三
河路訪舊重過白板扉文選樓邊銷遠夢廣川祠畔
倚清暉新題詩品應千古墨瀋還看落紙飛

孝威方選詩觀

三集題日慎
墨堂詩品

曉渡揚子望金山

廿年幾度望金山草草歸舟信往還風日半江宜遠
眺妙高臺在翠微間

歸次錢塘和朱竹垞贈別韻

偶謝朝班引犢車歸來三徑近何如生還已是

君恩重敢道還山學著書

其二

松竹吾廬夢裏看一帆今得艤江干沂流處處溪山
好百尺桐君七里灘

題畫

清絕此山中結廬宜永日門外小橋橫流泉遶蓬華
孤樹不知名亭亭留古質俗客從未來扁門自蕭瑟
中有浣花翁呼之儻可出

夜集

家釀朝來熟春盤更得魚兒孫陪夜話兄弟共閒居
祇覺圍爐好都忘對客疎病夫且堅坐快飲莫教虛
三兒舉孫喜成

燈下傳呼近新添第四孫熊占方一索雁序有諸昆
伏枕初聞喜扶筇便出門歡陪湯餅會莫惜酒盈樽

同諸孫松下曬日

臘月天氣晴南窻宜好日病起向園亭諸孫松畔出
隔離見阿翁歡呼頗不一長孫麤解事問答亦詳悉
其次能彊記開軒弄紙筆倔强是三孫揚揚索梨栗
怪我鬢似銀笑我領緣蝨黃獨試分嘗團圞齊繞膝
相悅更相爭天真自洋溢老夫爲開顏對此忘疢疾
含飴娛老年陶然得真逸



